

宋

會

要

全唐文

宋會要檢驗

真宗咸平三年十月詔今後殺傷公事在縣委尉在州
委司理叅軍如闕正官差以次官畫時部領一行人躬
親檢驗委的要害致命去處或的是病死之人只仰命
官一員畫時檢驗若是非理致命及有他故即檢驗畢
畫時申州差官覆檢詣實方可給與殯埋其遠處縣分
先委本縣尉檢驗畢取鄰近相去一程以下縣分內牒
請令尉或主簿一程以上只關報本縣令佐覆檢獨員
處亦取鄰州縣最近者覆檢詣實即給屍首殯埋申報

所隸州府不得推延 大中祥符六年二月一日詔曰
京邑至大閭閻實繁每有喪亡重行檢視或在鬱蒸之
候頗稽藏瘞之期爰覩奏對請從簡便然則民命至重
刑政攸先官司所陳固軫盡傷之念命令將出彌增欽
恤之懷宜令開封府自四月至八月死亡者不須覆檢
餘月仍舊施行 天禧二年五月十三日權知開封府
樂黃目言應有非理致命及諸般殺傷人屍首如檢驗
覆檢官吏等定奪得致命去處大事得正或有小可聲
說傷損去處不同別無妨礙不係要害致命去處者只
從違制失科罪如是鹵莽不切定奪出入致命去處即
從違制從之 先是本府官司檢定金刃殺傷屍它官

覆檢則以為蕪捷所害初檢官坐是差繆從違制徒三年科罪至黃目言其刑名頗重故條約之三年九月十六日詔今後三月以後八月以前應有非理致命公事只本州縣差官覆檢九月以後一依元敕施行仁宗天聖元年四月十二日審刑院大理寺言諸道州縣分每有非理殺傷公事遇夏月請官覆檢去隣縣遙遠之處有所未便欲望自今應諸處覆檢屍首不以冬夏並依咸平三年十月敕施行其天禧三年九月敕更不行用從之二年四月十二日詔諸處有病患及非理致命身死者須候再差官覆檢方得埋瘞外州闕官處頗有淹滯炎暑多致傷壞因有異同枉興詞訟宜令今後

所差官須集干連人分明檢驗具有無他故定上自四月一日後至九月更不覆檢春冬依舊施行 三年十一月詔今後春冬月在京及畿內縣鎮除非理致命事有不明兩爭并干礙勘照死刑須合覆檢者即以前較差官覆檢外其餘自縊割投水病患諸般致死事理分明者檢驗後屍首主別無詞說即給付埋殯更不覆驗

明道二年十二月二十七日河東路提刑點獄張仲尹言應刑獄司內有要切罪人病患者乞差不干礙官隔手看驗從之 景祐三年四月三十日開封府言舊制公私家婢僕疾病三申官者死日不須檢驗或有夾帶致害無由覺察望別為條約詔今後所申狀內無醫

人姓名及一日三申者差人檢驗餘依舊制 五年七月二十一日大理評事林栗言伏覩編敕應殺傷及非理致命公事在縣委尉在州委司理叅軍畫時躬親集衆檢驗委的要害致命去處申本屬州軍差官覆檢給與埋殯縣尉即檢驗訖於最近州縣有雙員處請官覆檢受請官不得推避竊詳諸縣只當於最近州縣有二員處卽官覆檢今來不明上件敕意每有非理死傷公事縣尉檢驗纔畢多就近移牒本縣今便行覆檢欲乞今後縣尉檢驗訖於別州縣最近處請官覆檢不得一例移牒從之康定二年二月十七日詔自今諸縣令佐受到諸縣牒請覆檢者須本縣簿尉及監當官員闕縣

令獨員在縣方聽依條免去 神宗元豐八年六月二十四日知河南府韓絳言山陵役兵病死方盛暑之際臣權宜與免檢覆然輒違詔條自劾以聞工部言人命所繫恐致弊詔特依絳所奏仍赦罪 哲宗元祐七年七月十一日殿中侍御史楊畏言在京刑獄姦弊近開封縣申李寶病癰死及本臺牒府差官覆檢乃拷掠致死其糾察在京刑獄一司既歸臺察今後若有禁囚死亡乞從御史臺差官依條檢驗施行 徽宗政和七年十月十九日詔訪聞福建路州縣鄉村委官檢驗覆檢多不躬親前去只委公人同耆壯等事干人命慮有冤枉仰提點刑獄申明條法行下州縣違者奏劾不以赦

原宣和六年六月十八日淮南西路提刑雷壽松奏
殺人公事有司推鞠以驗定致死之因為據兩檢驗官
吏多是規避並不即申驗狀動經旬月若所驗致死之
因不實不盡而獄情疑貳未決或兩詞互有陳論雖欲
再差官覆檢則其屍已是壞爛難以辨明往往遷就挾
同結斷甚者受賂請託以時增改蓋緣從來未有定申
發驗狀條限今欲乞應驗屍官吏候驗限當日具驗狀
申所屬仍於狀內分明書填驗畢申發日時如違限仍
乞立斷罪刑名詔依所乞發達限從杖一百科罪高宗
紹興三十二年閏二月六日臣僚言在法檢驗之官州
差司理縣差縣尉以次差丞簿監當若皆闕則須縣令

自行至於覆檢乃於鄰縣差官若百里之內無縣然後
不得已而委之巡檢三尺具在不可不守方今州縣之
官視檢驗一事不肯親臨往往多以事辭免率委之巡
檢蓋緣巡檢武人其間多出軍伍致有不識字畫者茲
胥猾吏因得其便往往是非曲直顛倒徇情乞申嚴檢
驗之條其初驗官須委司理縣尉丞簿不許以事辭免
至於覆驗如委無官可差仰所在州縣選差曉事識字
巡前去如有不虔重寘典從之孝宗乾道元年五月二
十六日臣僚言近日州縣所差檢驗官其間多有素昧
書畫庸懦畏避之人乞今後遇有差檢驗官令守令選
擇諳曉世務者內武臣仍差識字有心力人從之 九

年十月四日臣僚言諸大辟同案五人及殺人應死而
死不經驗旁無證佐不應奏者監司一員審問如在三
百外則牒鄰州通判此着令也其間乃有視為不急之
務在近固未必躬親審問而在遠者鄰州通判亦復託
故不行甚至擇主簿監當無能之人州郡可輟者充大
使冤濫何所伸訴欲望申敕刑寺檢舉施行詔御史臺
覺察 淳熙元年五月十七日浙西提刑鄭興裔言檢
驗之制自有成法州縣視為閑慢不即差官或所差官
遲延起發或因道里隔遠憚於寒暑却作不堪檢覆或
承檢官不肯親臨合干人等情弊百端遂使冤枉不明
獄訟滋繁今措置格目行下所屬州縣每一次檢驗依

立定字號用格目三本一申所屬州縣一付被害之家
一申本司照會並依格目內所載事理施行并繳格目
一本令刑部鑲板頒下諸路提刑司依此施行從之

興裔措置格目云一某處於某年某月某日某時據某
人狀乞驗屍首本案人吏某人承行於某日某時差某人
賁牒某處官初檢本官解舍至泊屍地頭計幾里人吏某
人押批本案某官覆檢亦如之 一初檢官某時承受將

帶件作某人人吏某人於某日某時到地頭集耆甲某人

保正副某人及已死人親

如是親兄即填云親兄如是堂兄即填云堂兄之類

某人

初檢到已死人某人痕損數內致命因依的係要害致命
身死分明各於驗狀親簽於當日某時差某人賁初檢單
狀保明申某處仍於當時對證入某字號通具狀繳連檢

字號通具狀繳連格目申本司照會人吏某人押批覆檢

官職位姓名 慶元二年十月四日敕令局以淳熙令

紹熙五年十月四日聖旨指揮參酌增闋修立下條諸

驗屍州差司理參軍本院司理別差官或止縣差尉闕即

差簿丞出縣不得監當官皆關者縣令前去若過十里或

驗本院因牒最近其郭下縣皆申州應覆驗者並初驗

日先次申牒差官應牒最近而無縣者聽就近牒巡檢

或都巡檢使內覆驗應止牒本縣官而獨員者準此右

入淳熙重修職制令以淳熙令并紹熙五年十月係衝

改元條乞行下刑部先次遍牒遵守施行從之以知長

子震有請故也嘉泰元年正月二十八日臣僚言近日大辟行

克之人鄰保逼令自盡或使之說誘被死家賂之錢物不令到官嘗求其故始則保甲憚檢驗之費避左證之勞次則巡尉憚於檢覆又次則縣道憚於勘鞫結解上下蒙蔽欲知省事不知置立官府本何所為今若縱而不問則是被殺者反為妻子親戚乞錢之資甚可痛也乞明指揮凡有殺傷人去處如都保不即申官州縣不差官檢覆及家屬受財私和許諸色人告首並合從條究治其行財受和會之人更合計贓重行論罪從之嘉定四年十二月二十二日江西提刑徐似道言推鞫大辟之獄自檢驗始其間有因檢驗官司指輕作重以有為無差訛交互以故吏姦出入人罪弊倖不一人命

所繫豈不利害伏見湖廣廣西憲司見行刊印正背人形隨格目給下檢驗官司令於損傷去處依樣朱紅書畫橫斜曲直仍仰檢驗之時唱喝傷痕令衆人同共觀看所畫圖本衆無異詞然後著押則吏姦難行愚民易曉如或不同許受屈人徑經所屬訴告乞徧下提刑司徑行關會樣一體施行從之既而刑部取索所刊正背人形式樣參酌大理寺申稱湖南提刑司格式稍為詳備乞下諸路提刑司體倣施行 六年十二月六日臣僚言今縣邑檢驗偶本縣有嫌合牒鄰縣委官鄰縣多不相統屬或遇移文不曰所屬官有假故則曰已差出無人或預有所聞則併與緘封不啟如此數四往返累

日雖即申聞憲司州郡亦非旦暮可畢暑月腐壞至不可驗由是姦胥黠吏因得並緣不得其情多基於此乞下諸路提刑司約束諸縣遇有檢覆公事合牒鄰縣差官者即於移牒封題明著某事有辭避不承稽違時日者重與責罰從之

全唐文

宋會要 稔實

太宗至道二年八月十一日蜀州言捕獲劫賊十人內
文次年十三其父令持兵器從行法當死帝以其幼隸
特宥之 真宗景德元年八月八日知壽州陳堯佐言
飢民劫害歲粟麥者凡七十餘人以彊盜計賊並合處
死詔並決脊黥面配牢城為首隸五百里外餘隸本城
四年十一月十一日有司言捕獲象州民盧霜等嘗以
飲食饋賊已減死決杖配隸諸州比類竄遁者已數令
擒捕請行嚴斷帝曰遐方愚民為賊所迫供置食物乃
是常理乃揭榜曉諭並釋其罪已獲者令本州量事決

責以聞二十日驍騎小校張信棄市餘配隸外州信訴
指揮使蓋贊御下嚴急鞭撻過當陳堯叟曰都虞候李
繼和言士卒不稟所部合從軍令帝曰如罪在士卒可
以嚴斷若拙楚過當安可不盡其理耶馬知節曰太祖
朝每命將校唯取剛方有斷士卒畏威者帝曰此蓋時
所宜爾即下吏按劾信疑云贊飲酒後教習決責部下
信遂以弓弣擁卒四十餘厲聲曰我輩終為指揮使衆
醉所鞭殺即徑詣馬軍司陳告贊雖曰飲酒而所鞭士
卒皆有過者繼和請斬告者十餘人餘配沙門島罰指
揮使都虞候詔誅信餘決杖配隸外州輕者復隸本軍
贊決配許州負僚直其都虞候不能覺察副指揮使不

能裨贊並下本州決罰十二月六日釋殿前司虎翼都
虞候高鸞城外都巡檢步軍副都指揮使王隱罪初河
南場火隱等集近便營兵救撲而殿前司上言鸞等非
本轄當俟宣旨請罪之帝以救焚之急又隱以便宜行
事故詔釋之因戒自今令遵守往制 大中祥符五年
九月十八日開封府勘糧料院專勾院吏因諸軍批請
納賂罪當徙帝曰此但紙筆之費累而為賊第決杖釋
之八年五月二十五日妖人谷隱黥面配虢州牢城遇
赦不放還新重榮黥面配汀州牢城斬有面黥面配沙
門島詔解州等內百姓僧道等曰先王立法在恆力而
必誅有國詳刑亦哀矜而為務顧小民之多僻習左道

業

而相傳苟用常科難逃極斷屈茲彙憲投寘遠方惟彼
明徒合行追捕特從寬宥咸許自新其谷隱下弟子除
係禁勘別行指揮外其餘干連人並放仰州縣安撫各
令着葢自今不得傳習隱先以罪編管於解州因用妖
術惑郡人重葢師事之有方嘗給取隱資財甚衆至是
御史鞠劾而謫之 天禧元年十一月六日開封府長
垣縣民李遂與其子同盜殺驢法並坐徒詔特免其子
五年四月十二日事材場軍士楊勝等三人杖脊黥面
配沙門島當宿監官內殿承制石惟清削兩任贖銅二
十斤勒停下番監官內殿崇班閤門祇候主承僅供奉
官閤門祇候張惟一並勒停自餘主典軍校皆決杖降

職有差坐本場火發勝等洎惟清法當處死特貸之

仁宗天聖元年十一月十二日知漣水軍都官員外郎

鄧餘慶永興軍興平縣監酒稅殿直何承勛鎮南軍監

進賢鎮監酒務殿直易著明秦州三陽寨主供奉官閣

門祗候荆信特貸命決配遠處牢城餘慶坐受承天院

僧惠良銀器蓋越差充院主承勛自盜官印印文鈇并

盜官錢著明偷官錢酒及截落稅錢入已信將陳未等

假借人戶名目作新色斛斗入中求利入已並准條合

處死特貸之仍降詔諸道今後更有似此違犯必當依

法施行十一月十六日寧州民龐張兒特貸死罰銅百

二十斤與龐惜喜家審刑院斷張兒毆龐惜喜死當極

刑張兒年九歲童稚爭鬪無殺心特矜之四年二月二十四日開封府教學人董可道特貸死杖脊十七放可道善學生死宰臣曰據法合死然原其情理教道重孺不施復楚無以訓習故禮稱家塾黨庠術序乃閭里就學之所帝曰情雖可矜法亦難屈知府王臻亦言父母無他子頓甚悲苦特有是旨以慰父母之心六年五月十二日貸鳳翔府整屋縣尉孫周翰命決杖二十刺面配廣南城牢以決百姓田義至死非辜而恩矜之十月六日貸前滑州觀察使索希甫死刺面決配遠州牢城以希甫受百姓劉興錢銀斷阿張劉興聽離合枉法極刑特寬常法全之

七年五月七日京兆府民魏太嬌

妻趙處死特給母張錢二十千米五石并廩諸縣日食米二勝終張身奏裁趙毆太嬌至死當處極刑據太嬌母張狀稱趙有男四人皆幼小張年八十六無的親恐趙歸法之後難以自治府為具奏特有是旨九月五日泉州民柯智特貸命杖脊刺配廣南智毆養男蔡伯先死法當棄市本州言智養伯先為子已五年上請特矜貸之天聖八年十一月六日監翰林司閤門副使郭承祐特貸命免決刺除名配岳州衙前編管坐盜金銀什物除罪輕及該赦外計贓一百四十一匹零監主自盜合寘極典詔從寬宥儀鸞司指揮使謝演私借壁衣與承祐翰林司專知官郭顯勾押官賀吉前行開元庫

子趙達聞遇知盜不告及為承祐取索偷那官物於厝
上私作入庫長行趙德於衣版內偷藏出官物事發赴
走八作司典苟潤私借赤白匠與承祐家私使各杖一
百翰林司庫子蔡贊等六人藥童長行關成庫子董昇
儀鸞司工匠侯昌金銀庫子張用等四人翰林司長行
李均等一十四人十將劉和法酒庫長張熾並受承祐
指揮盜出官物及借金銀什物等罪各杖八十翰林司
指揮使丁矩寄藏官酒合杖九十比部員外郎郭世隆
為男承祐送到手本額外當直長行七人在宅私占及
受男將到官物承祐已坐罪流合杖八十私罪翰林司
副 趙興藥童長行王恩知承祐偷盜不告犯在赦前

合原免詔演矩並於外州近下軍分降資安排興於外
州近下軍分安排丁將專知官勾押官等並移近下庫
世隆特勒停又翰林司監官郭中和於官曆上押字撥
酒供與承祐合徒一年私罪監御厨李遵懿監八作司
劉懷懿徐奎張永和各不合借工匠與承祐勾當庖務
欽恕不合私差宰手並從杖八十私罪同勾當翰林司
夏元亨王守忠各不覺察杖八十公罪監儀鸞司劉從
愿王克基何誠用藍昌裕林志華各杖六十詔中和特
勒停遵懿恕懷懿奎永和元亨守忠並衝替餘並勾當
亦差替各未得與差遣九年七月七日慶州民楊士康
特貸命配隸廣南牢城坐偽刻蒿塲印為輸欵計贓應

死特矜之八月三日麟州民黃晟囊免死黥面配沙
門島遇赦不還坐貳將公歸死計贓錢裁千五百法皆
死特矜之九月二十八日都官郎中前知嘉州張約免
死杖脊黥面配連州牢城坐受賕枉法計銀千五百兩
法抵死在降詔約束之前其後又受銀二百六十兩法
應絞特矜之初聞約在郡貪瀆詔轉運使高觀體量其
事且言約越次補牙職又令教練使楊澄吉恐唱取揚
齊古錢澄吉逃遁即分遣使搜捕揭榜許吏民告首約
時以代歸華州遂委陝西轉運司押領赴嘉州澄吉亦
坐黥面配商州坑冶十月三日渝州民黃添特免死黥
面配隸海島坐擬殺盜粟人程大法應死特矜之十一

月二十三日舒州民王翰堂叔昇挾刃殺翰翰以挺傷
昇死詔釋之十年正月二十四日安州叔賊胡參特貸
命黥面配沙門島參以父命叔孫緒財法當死情可憫
特矜之二十八日益州民費進特贖銅百二十斤婢趙
氏配鄰州羈管坐怒趙索逋錢毆趙死法當死進年十
四上請特矜之三月九日真定府井陘令張起免除名
奪三官坐倍取職田細絹十五匹法應奪四官除名特
矜之四月十八日虞部郎中知興州王浹特免黥面配
廣南本城永不錄用坐冒請官職田估贓絹百七十匹
法應死用赦原罪外有不容佃戶訴災輸物估贓五十
匹法應加役流除名特矜之六月四日祕書丞知永興

軍興平縣王衆特免除名授廣南文學坐受銀估贓絹三十匹法應加役流特移之 明道二年正月十三日

廬州言州境災歉有偷掘白殯墓見尸望貸命決遣詔贓錢不滿一十如法豐稔仍舊 景祐元年正月二十

八日濠州民王泮奇罰銅一百二十斤入楚李婆之家

泮奇相爭斫木柴用鐮斫傷楚李婆致死合處死年九

歲上請特移之三月十七日西京作坊使英州刺史知

定州馬洵美特貸命除名免決配連州牢城特禁馬慶

宗除名坐以公用酒米等偷糶入已法應死特貸之七

月十三日密州民劉道明王真貸命刺配廣南牢城毛

晟三人決杖十七道明坐妄論王真計謀同事夜間聚

會假造劔霞草龍惑衆准條處死最等知妖妄不告合
徒一年半特詔矜之八月九日濠州民謝象爲李齊打
殺母并驚殺孩兒後却打齏致死合決春情理可憫詔
象特放四年二月七日洪州別駕王蒙正特除名配廣
南編管永不錄用坐私通父婢前任取受楊澄吉金故
入溫嗣良流罪合流三千里特有是命司理參軍劉漢
主簿鄭照爲從各徒三年衆怨虛稱折賈得小池莊杖
八十並該赦釋放詔恕照並勒停溪衝替蒙正女從德
妻今後不令入內兒女見與皇族爲婚者除已成結更
不得爲親閨四月二十七日武寧軍節度使真定府路
總管夏守恩特貸命除名配連州編管坐受軍民錢物

枉法贓六十二匹合處死職事官三品請議驍武軍士
周祚轉運錢物事發逃走捉獲合處斬男內殿承制元
吉取受借錢虛妄上奏假令其徒上書詐不實徒二年
本司手分孫素各不取覆合決杖一百詔守恩付朝堂
集百官議據御史臺奏請依斷處死詔特貸極刑周祚
貸命刺配沙門島元吉等依斷守恩差使以兵卒三十
人監押前去六月三日六宅副使李士彬殺義男并堂
姪女小兒三口法應死詔士彬久在邊任特貸極刑依
舊勾當今後更有所犯必行朝典八月十九日太常博
士曾易占除名配廣南衙前編管坐前知信州玉山縣
受賂事發命監察御史裏行張宗誼按其罪法當死特

貸之五年五月四日開封府言殿侍李玉逯歸安州葬
母事訖首身詔特原其罪 康定元年三月四日原州
乾興寨主供奉官李繼明監押殿直孫佖並特貸命決
脊杖二十刺面配沙門島坐賊圍鎮西堡不盡時出兵
赴堡救援及改換時辰申報致官軍敗衄合比附死罪
除名特矜之 慶曆四年四月十日知秀州祠部郎中
集賢校理錢仙芝特貸命決脊杖十七配沙門島遇赦
不還坐在任遺趙枉法贓滿法當死特矜之 英宗治
平元年四月三日左侍禁監温州商稅徐可道令兵興
寫編敎事既發乃題充公用法寺斷私罪杖詔特改為
公罪六月九日三班奉職和欽貸死免決刺配福建路

牢城欽貸所部慶州綱錢賊至絞特減死審刑院盧士
宗奏欽坐情輕乞稍寬減帝曰刑故無小若故而得寬
則犯者滋甚非期無刑之道俟有過誤貸無傷也 神
宗熙寧七年十二月二十一日入內祗候高班內品紫
慶之梁恭禮入內高班吳立張德恭特免除名勒傳入
內副都知左驎驥使王昭明追兩官免除名勒傳入內
殿頭張球衛元璉追一官勒傳慶之誤發內降文字恭
禮白昭明令立德恭入內求麗夫人重封印盜御寶流
三千里係十惡除名勒傳球元璉知所部犯法不舉劾
減三等特矜之九年五月三日開封府百姓孫真持杖
辱配汝門島遇赦不還勾當皇城司內侍押班王中正

置銅三十斤守衛人特決杖一百真造妖言越皇城宮
城殿垣於法處死守衛人徒二年半特矜之 元豐元
年二月二十三日止批前安南戰棹都監楊從先等昨
以孤軍深入賊境大小數十戰雖無甚斬獲然官軍亦
不至傷敗而師還繫獄殆將逾年原其勞於王事實可
矜愍况昨已經郊赦宜並釋之其一行有功將士等第
賞錄二年正月二十六日詔勒傳人前梓州司戶叅軍
姜適狂妄上書因上惑眾特示寬貸可除籍郴州編管
適辟穀自謂有長年術館于金明池其方不驗故也五
月二十三日梓夔路鈐轄司上瀘州路分都監王宣等
所部親兵不救護主將詔並免死等第決配重傷人免

卷之四

秋七月十二日詔御史臺見鞠安南宣撫招討司事吳
克諸子有干涉細故並免根治四年十二月二十三日
宣州觀察使入內副都知李憲言準朝旨具析擅歸本
路因依臣以糧草感迫不可久留遂遞遞迎接餽運詔
憲力圖來効以贖今罪五年正月六日環慶路經略使
言涇原路隊將李貴扇搖兵眾逃歸乞特行法以懲後
盧秉又言貴情非巨蠹昨以出界兵將上下失律臣即
權宜傳放罪指揮兼已奏得朝旨若更追効恐致驚疑
詔釋之二月五日開封府言令文諸老幼疾病犯罪應
罰銅而孤貧無以入贖者取保於放本府日決獄訟應
贖者多孤寡貧乏又無鄰保不免責廂巡狀以便取保

之文自今乞從審察貧乏直行放免從之二月二十一日桂州張頴言昌化軍劫掠破結九人犯持仗強盜殺人罪皆死緣係捕盜官招誘令解下弓刀吏與酒食然後擒縛若從捕獲法慮致生黎疑懼將來無以示信詔釋之五月十三日河東經略司言豐州屯駐神銳指揮因脩葺蘆寨王安等百餘人鼓動軍眾擅還豐州及恐喝指揮使張臻語言不遜內已捕斬十六人詔續捕獲人整左明者並處斬餘更不得推究為首之家屬應緣坐者押赴豐州處斬其後經略司言安等已斬莫知為首者而安有母年六十三上特貸之十月六日詔涇原路第八將戴嗣良賈辦免所追官先是嗣良等出師亡

失二分一釐當進一官既而嗣良自陳計數不及二分故詔免之六年十一月十七日朝請郎蒲宗閔可免勅為尚書都官郎中初詔張汝賢定奪宗閔與郭茂恂互奏事多不當以茶法推行之初宗閔能協力職事不為異論所搖故免之十二月二十二日上批追官免勅俾衡替人孫諤元犯情為可矜又經大宥可除落衡替諤為國子監直講坐受參知政事元絳囑從孫伯虎陞內舍及為絳請求判監黃復以伯虎為小學教諭進兩官諤上書自明故有是詔七年十一月二十二日詔太府少卿吳安特免勅停差監曹州酒務先是安持誣奏宰臣蔡確弟碩應私罪徒二年蔡確言安持本緣臣家事

乞特寬赦故有詔十二月一日三班奉職李傑貸死免
除名追二官勒停坐歐盜袴逆卒死大理寺當廢公罪
絞特貸之八年五月二十四日刑部言趙譽等坐父世
居嘗謀不軌除名停降錄開今已十年乞比類流配人
詔免錄開就僧屋居之 哲宗元祐元年閏二月二十
二日刑部言乞應該登極赦以前雜犯配軍除元係軍
人及宣敕永不放還者更不移放其元犯殺人放大強
盜偽造符印謀殺人持杖竊盜罪至徒雜犯死罪貸命
并餘罪徒已上情理凶惡者在京令所屬及開封府步
軍司諸路令轉運使副判官提刑司取索元犯看詳量
移從之四月六日監察御史孫升言知興國軍楊繪簽

書淮南節度判官廳公事沈季長註誤深刑情非故冒
嘗居近侍義難自陳望特令理訴斷遣所取索元業看
詳從之五月八日殿中侍御史林旦言熙寧初改議助
役法知許州長葛縣事樂京知唐州湖陽縣事劉蒙各
因入州會議役法遂自劾待罪作擅去官公罪徒二年
各追一官勒停情實可矜願令有司改正又看詳訴理
所言樂京言役法不便自劾待罪斷徒二年公罪即與
擅去官事理不同合從末減詔樂京特與除落致仕授
承議郎召赴闕劉蒙物故賜帛五十匹付其家八月十
八日刑部言重法地分奴盜因按問首告減等依常法
妻子不緣坐慮有已行編管者請令逐便從之二年二

興
應作聖

月十六日奉議郎前軍器計置材料劉仲昕前軍器少
監蔡碩並貸命免其決追毀出身已來告敕文字除名
勒停仲昕送昭州碩韶州編管三年四月二十一日監
察御史趙屺言元豐敕重法地分元叔盜者妻子編管
元祐新敕一切削去則前此編管者宜不火請令從便
從之八月十三日秀州團練副使本州安置不得簽書
公事沈括賜緡百匹仍從便居住以括上緡修天下郡
縣圖故也五年九月二十五日詔勝如堡使臣執到西
賊四人特免責罰熙河蘭岷路經略使范育知蘭州种
誼並特放罪八年九月十五日詔京東西河北淮南路
饑民為盜者特末減 紹興元年二月二十七日中書

有言聞河東路災傷所被甚廣慮饑民為盜請河東路
轉運司災及七分處盜罪至死減等杖脊刺配牢城五
月十五日詔編管黃州蔡碩特放逐便從其母請也七
月二十一日宰臣章惇等奏曰前日再謫呂大防劉摯
蘇轍梁燾劉安世并司馬光呂公著追謚誥贈典及仆
神道碑既時朝堂眾論咸以為寬餘人連逮尚眾陛下
許其自新一切不問莫不忻悅上曰據其罪狀甚可誅
然不欲究其事乃用輕典聊示懲責爾十一月十六日
開封府民呂安坐汴乘輿大理寺論當處斬上批特貸
死再取旨上曰此因醉狂語與情理悖逆者異故貸其
死二年正月十一日詔開封府寄杖未決罪人悉緣病

孕久廢囚繫方春發生推覺大應徒罪情重減從杖一百情輕減從杖八十餘罪不以輕重並放殿前馬步軍司大理寺准此 元祐二年二月十七日上御崇政殿軍頭司引見涇原路擒獲西界統軍龜名阿埋妹勒都逋等共二十七人詔並特貸命釋縛押赴懷遠驛閏九月十六日詔東頭供奉官權鎮戎軍平下城監押劉貴特貸命除名勒停留充本路極邊巡防使喚坐擅殺斗子李立以戰功贖罪也 徽宗崇寧元年二月十六日詔趙諗謀反從坐者既已伏誅應曾誑誤人未任吏者勿推親戚不當緣坐者並釋放五月二十三日詔曰昔在元祐權臣擅邦倡導邪朋誣詆先烈毒政良法肆為

紛更紹聖親攬政機灼見群慝斥逐流竄具正典刑肆
朕纂承與之洗滌悉復收召寘諸朝廷而締交合謀彌
復膠固唯以沮壞為報復仇怨為事論譎訛訛必欲一
變熙寧元豐之法度為元祐之政而後已凡所論列深
駭朕聽至其黨與則遷叙不次無復舊章或諛冗散之
中登殿閣而撫四面或既殂謝之後還舊職而加橫恩
撓法惠姦鮮不類此稍從屏遠姑務函容而言路交攻
義不可遏迺擇其尤者第加裁削以適厥中尚慮中外
註誤之人未免反側盡詳示訓諭以慰安衆情應元祐
以來及元符未嘗以朋比附會得罪者除已施行外自
今已往一切釋而不問在言責者亦可復輒以為言朕

言不渝群聽母惑四年七月二十二日詔曰朕嗣承先
烈夙夜究宣罔敢怠忽嘗懼弗及迺者詢謀逮下而士
輒乘間詆訛無所忌憚朕惟父子兄弟之分於義有害
在法靡容已屈常刑止從速寃然士流於俗見利忘義
久矣朕甚憫焉蓋行法而明教有過而示恩貸其終身
不齒之罪俾之自新朕之遇士厚矣應上書奉疏見羈
管人可特與放還鄉里仰州縣長吏同監司取責親屬
保任其身仍令三省量輕重具名立法聞奏九月五日
詔曰元祐姦黨詆訛先帝罪在不赦曩屈常憲貸與之
生屏之遠方固無還理棄死貶所豈不為宜今先烈紹
興年穀豐稔鑄鼎以安廟社作樂以協神民嘉祥荐臻

和氣浹洽肆頒赦宥覃及萬方興言邪誣久責遐裔一
夫失所朕尚惻然用示至仁稍從內徙服我寬德其革
爾心應嶺南移荆湖荆湖移江淮江淮移近地惟不得
在四輔畿甸大觀二年四月十三日開封尹宋喬年
奏欲乞今後外州軍承開封府移送到強盜不曾殺人
但賊滿或傷人應死者并同犯人並許奏裁所責萬一
有原貸之理可以廣陛下好生之德詔強盜賊滿傷人
法所不貸者已衆及貸于京師而不貸於移送之人法
不一矣可依所奏政和五年十月十八日詔成中郎
監政州清川縣市易務沈希能係宗室女夫因事下獄
今已一年家極貧乏無以贍給其宗室女年又止有一

嬰兒外並無人照管。魚累經赦。宥可特赦。罪仍免。根勘。
六年四月十三日。詔眉州違法開井。本路轉運司已行。
改正。校閣了畢。所有令提刑司取勘。漕臣指揮更不施。
行。特與放罪。八年六月二十八日。詔曰。朕惟先王以仁。
為恩。以義為理。仁之施者。惟恐其不博。而義之盡者。有。
所不為。朕奉承祖宗。今紹德澤之美。垂休無窮。稽唐虞。
忠厚之政。解漢唐嚴苛之法。所以惠天下者。甚厚。比年。
以來。內自畿甸。外薄四海。民重犯法。圜圉屢空。而逆亂。
之謀。謗議之言。與夫妖妄。矯誣。撰造。非語。不在於鄉閭。
之小民。賤吏。而出於勲臣之世。禁從之間。庠序崇養之。
士。迭相附會。以偽為真。朕照知邪謀。俾加驗治。至于旬。

決蹤跡既露乃命有司佐以近密研窮究情犯斯得
尚慮獄詞或出誣伏詔遣審錄至于再三閱實無與一
聽以法無加損焉姚立之王大年一介賤士不足比數
劉昂出入禁闥腹心之臣王寀儒館通籍勲閥之後而
議論交通蹤跡徃復詩歌酬唱辭所連逮者三十人悖
逆不道謗訕妖訛載籍所未嘗有人臣所不忍聞立之
大年棄誅止其身家屬悉原昂特貸死長流海外又聽
其子隨逐非故屈法宥奸盖所以體天道之貴生視斯
民之親德故茲詔示可出榜朝堂布告在位咸使聞之
宣和三年五月十五日通判睦州葉居中特貸命免
真次判配長流瓊州今所在州軍枷項差大使臣一員

追

禁軍二十人將校二人管押前去逐州交替坐部領管
下巡尉弓兵同杭越將兵二千五百餘人收捕兇賊方
十三等致損折軍兵人數甚多仍被賊徒入城放火居
中自陳有母親陳氏年老見病別無依倚又自緣顛損
腰脚見求醫將理待罪乞賜寬宥故有是詔六年四月
二十一日責授岳陽軍節度副使致仕李邁可特從寬
貸降充團練副使依舊致仕免除名安置坐令京東密
務監官收買木植並不依價支錢又支官錢買賣求玉
入家法寺奏除議減外徒三年合追見任并歷任兩任
文字詔以邁被遇神考及累立戰功故有是旨七年五
月十七日詔昨處分招安河北京東路群賊如能出首

應已前罪犯一切不問並與釋放各令歸業訪聞賊徒多有元被驅虜協從入火已曾作過後來未經官司招安間先已出火並已經招安出首歸業後去失元給公憑者因而鄉里不敢存住走竄他處或投刺充填諸軍之人既已自新其未充軍者日前若作過為盜等自合依所降招安前後分處一切不問免罪收管如有見在官司收禁之人依此施行 欽宗靖康元年六月二十一日詔統制官郝懷張達並除名勒停隨軍自效以擅離南北關地分法當斬河南制置副使解潛有請特貸之八月二十八日尚書省言福州將兵作過殺守臣柳庭俊已就招安緣將副劉政姚成等先不能彈壓兵衆

以致作亂至南劍州乃能擒捕首惡之人詔將官許以
功贖過其餘軍兵並放罪高宗建炎元年八月一日
詔余大均陳仲洪芻各特貸命除名勒停長流沙門島
永不放還張卿才責授文州別駕雷州安置李彛責授
茂州別駕新州安置王及之責授隨州別駕南州安置
周懿文責授隴州別駕英州安置胡思責授沂州別駕
連州安置以御史鞠治陳仲余大均洪芻王及之等皆
在圍城中誘致內人為妾及因挾割金銀自盜入已論
當棄市上曰王及之等所犯當戮有司之法如此但朕
新政重於殺士夫故有是命四年五月二十七日詔修
職郎蔣安義進武副尉張大任並特貸命內蔣安義除

名兄真決刺配瓊州牢城張大任夾脊杖二十刺配廣
南遠惡州軍牢城收管以安義等坐就番人招安投報
從偽命作知州通判及出榜賺人入城被番人虜殺死
不可計數知番人去依前入城偽領州事法當死故特
貸之九月二十九日范宗尹言昨日邵諤傳旨越州禁
勘內侍蘇淵子如無顯然罪犯即今日下疎放已依旨
施行訖上曰朕於有功即賞有罪即罰犯罪之人未嘗
妄貸止緣其家數人遺骸無人收斂於人情非所安儻
無顯過且令其子瘞之先是蘇淵者夜殺其一妻二妻
而自裁上疑二子預知因付有司十月二十九日臣僚
言今年春以前福建路提刑林杞擅殺苗傅徒中張政

除名勒停送連州編管惡罪罰過重未蒙施行詔林杞
放令逐便十一月十二日保義郎劉淇迪功郎陸寅趙
寧承信張椿承節郎於正吏部入品令史薛舜民吏部
左選守當官楊澤楊州助教鄭致百姓鄭甄屠與詔劉
煥特貸命除名勒停決脊杖二十刺配雷州牢城收管
楊澤薛舜民鄭甄趙寧陸寅張椿於正屠與並依斷內
鄭甄趙寧陸寅除名展三期叙張椿勒停於正降一官
鄭甄決脊杖十七送五百里外編管餘依大理寺所申
以漢竈偽造尚書省印吏部印各一顆偽印官告差劉
等因臣僚上言法寺鞠實薛舜民楊澤劉淇並合准條
於絞刑私罪上定斷合契重杖處死鄭甄陸寅並合於

流二千里私罪上定斷趙寧合於徒三年私罪上定斷
張椿合杖一百屠輿合杖八十並私罪上定斷故特貸
之十三日權知湖口縣孫成賊罪抵死貸命特剋配連
州牢城上曰祖宗時賊吏有杖朝堂者黥面特配尚為
寬典十四日詔迪功郎邵武軍泰寧縣主簿吳明卓特
降一資時本軍百姓頻移出城而軍期司人吏丁宗賢
者亦將人口出城明卓乃虛作知軍訪聞將宗賢斬首
號令法當死特貸之 紹興三年二月八日詔選鋒部
隊將借補保義郎王福特貸命除名勒停失脊杖二十
剋配瓊州牢城以福有酒毆殺嬖依法合死緣累立戰
功故特矜之三年三月十八日詔左承直郎池州東流

縣令王鮪特貸命除名勒停永不收叙送新州編管其
合追贓錢令所屬疾速依條追納入官以鮪節次納苗
米例外科納水脚等錢入已准條於絞刑定斷特貸之
四月四日詔李嗣昌特貸命除名勒停永不收叙送梅
州編管其合追贓錢令所屬疾速依條追納入官餘
依大理寺所申以嗣昌元係保義郎監汀州寧化縣商
稅鹽務嘗兼受納和糴未有印給虛鈔枰價入已等罪
改也十月十八日江南西路安撫制置大使趙鼎言乞
將喬信特降官資免行取勘或與放罪責其後效詔依
奏免勘特與放罪令本司責其後效以信軍馬把截捕
殺彭支等賊大徒黨數多眾寡不敵是致不能成功日

久憂疑不能安職故貸之十一月十七日詔承直郎權
邵州新化縣張師文特貸命除名勒停送韶州編管餘
依大理寺所申其合追贓錢等令疾速依條追納入官
以師文除罪輕該恩外法當死故特矜之四年九月一
日詔呂應問特貸命除名勒停永不收叙送化州編管
其合追贓錢等令所屬疾速依條追納入官以應問知
秀州華亭縣將贓田糙米換到苗米入已并将贓罰庫
枋歸湖州修屋刑部稱應問於贓罪絞刑上定斷故也
五年八月十八日淮南東路宣撫使韓世忠言選差統
領官韓彥臣等前往淮陽軍活捉到知軍成忠郎王拱
等并逐人家屬共四十二人詔王拱等不合從僞罪當

誅戮緣皆係朝廷赤子可特貸命依見今官資並送忠
銳軍第五將收管六年正月八日詔承信郎徐如海特
貸命追毀出身以來文字除名勒停決脊杖二十刺面
配化州牢城收管永不放還以如海屢往偽齊販賣因
過江來作姦細至臨安府劄探軍馬起發法寺鞠實係
情理重故特貸之五月二十六日詔偽都統華知剛等
一十三人不合從僞罪當誅戮緣係朝廷赤子並特貸
命撥與劉光世收管以鄺瓊捉獲故矜之七年九月二
十七日詔右宣教郎知温州永嘉縣李處廉特貸命除
名勒停送新州編管餘依大理寺所申仍籍沒家財以
處廉未赴任間受所部人周知萬錢物及令人吏代支

錢買乳柑不支還到任受葉訖郭浩金銀事及買到無
主船錢并贓罰錢不即書曆別置私曆及因林黃為公
事在官有女使高十八娘入城令吳徹顧本人充本家
女使因理斷葉昉與陳褒墳地事枉法受葉昉等金銀
法寺鞠實准條於絞刑贓罪定斷改特貸也九年七月二十七日
詔借補通直郎馮邦傑特免科罪令臨安府追毀借補
文字差人押出本界以邦傑上書所陳事言實無根理
不足採故特矜之十六年正月二十一日詔承信郎全
勝特貸命除名勒停永不收叙送宜州編管仍籍沒家
財以勝前監荆南府石首縣建寧鎮稅坐贓抵法故也
十七年六月十八日詔進武校尉李福除名勒停不刺

面配昭州本城收管以福本太平州駐劄軍以合伴符
杖行劫法當死特貸之二十四日詔右從政郎新建康
府司戶參軍張次留除名勒停永不收叙送循州編管
仍籍沒家財以次留前權湖州西安鎮稅坐贓法當死
特貸之七月五日詔保義郎房天倪除名勒停永不收
叙送蕪州編管仍籍沒家財以天倪前監江西安府司
酒務坐贓法應死特貸之九月十六日詔從義高珪除
名勒停送萬安軍編管以珪侵盜官錢妄投北界為泗
州押還法當死特貸之十二月二十二日詔左迪功郎
曾巖追毀出身以來告勅文字除名勒停送阮州編管
以巖前任鄂州管內安撫司幹辦公事因押經總制錢

赴行在沿路盜貸入已法當死特貸之二十六日詔武節郎楊林除名勒停永不收叙送化州編管仍籍沒家財以林權鎮江府駐劄右軍第二政將冒請逃亡事故軍兵錢物入已為都統王勝所劾法當死特貸之十八年五月二十六日詔右宣義郎詹宗古除名勒停送南安軍編管以宗古監臨安府浙江稅坐贓法當死特貸之六月九日詔保義郎太平州指揮使周用特貸命除名勒停決脊杖二十刺配昌化軍牢城收管以用毆擊妻阿龔因傷致死又逼逐阿龔前夫朱明二子出外且欲將明陣亡恩澤貸賣至是為其子所告法寺鞠實故有是命二十二日詔保義郎監潭州南嶽廟趙伯勳特

貸命除名勒停令臨安府差人押送大宗正司錄閉以
伯勛乘酒毆擊百姓錢三致死法寺鞠實乃有是命閏
八月二十七日詔武翼郎魏夫除名勒停永不收叙送
廣州編管以文前權西和州臨江寨兼管酒稅坐贓法
當死特貸之十一月二十七日詔武功大夫京畿第二
將臨安府駐劄廖同弼除名勒停永不收叙送惠州編
管仍管沒家財以周弼管幹修造景靈宮萬壽觀受贓
法當死特貸之十九年三月二十四日詔武節郎特添
差嚴州准脩差使韓展除名勒停送漢陽軍編管以展
毀妻辜內致死法當絞刑特貸之六月十四日詔左宣
教郎何柔中除名勒停永不收叙送容州編管仍籍沒

家財以柔中知前廣州新會縣坐贓法當死特貸之二十三日詔保義郎游伯虎除名勒停永不收叙不刺面配道州本城收管仍籍沒家財以伯虎前監潮州惠來場鹽稅犯贓法當死特貸之七月十日詔右通直郎通判遂寧府張括除名勒停送靜江府編管以括本廳主管印賣退馬減價欺盜官錢法當死特貸之十五日詔右迪功郎新差監臨安府在城都酒務孟彥康除名勒停永不收叙送賀州編管仍籍沒家財以彥康前權秀州崇德犯贓法當死特貸之八月二日詔承信郎建康府駐劄御前選鋒軍使臣張橫除名勒停送饒州編管以橫毆擊百姓馬臯辜內身死法當絞特貸之二十年

二月六日詔廷武校尉池州太平州駐劄御前都統制
王進下使喚靖臯除名勒停送南恩州編管以臯用刀
殺百姓蔣臘哥身死法當絞特貸之四月二十五日詔
右承務郎徐滋除名勒停永不收叙送廣州編管仍籍
沒家財以滋前監廣州都鹽倉坐贓法當死特貸之六
月十九日詔保義郎竇昱除名勒停送建州編管以昱
毆擊百姓鄭義致死法當絞特貸之二十三日詔右宣
教郎吳擇鄰除名勒停永不收叙送昭州編管仍籍沒
家財以擇鄰前知潭州潭鄉縣坐贓法當死特貸之二
十四日詔武功郎東文從義郎馮青陳全忠訓郎周寧
成忠郎趙興承信郎李真各除名勒停不刺面分配逐

州軍本城收管東天韶州馮青永州陳全建州周寧洪
州趙興建昌軍李真邵武軍以文等並持杖劫奪民財
法當絞故特貸之七月四日武翼郎御前破敵軍使臣
蘭宏除名勒傳送邵武軍編管以宏毆擊百姓李彥致
死法當絞特貸之九月十一日詔降授左承事郎前福
建路安撫司主管機宜文字吳元美除名勒傳送容州
編管以鄭煒告論元美任太常寺主簿坐與李光交結
因言章補外心懷怨望遂將蠅蚊為名撰造夏二子傳
指斥國家及譏毀大臣以快私忿刑并鞠實法當死特
貸之十二月二十六日詔右從政郎謝弼除名勒傳永
不收叙送靜江府編管仍籍沒家財以弼任普州安岳

縣令坐賊法當絞特貸之二十一年四月五日詔忠烈
郎關溫除名勒傳送潭州編管以溫毆擊百姓失二致
死法當絞特貸之十月十九日詔左武大夫充御前選
鋒第一正將陳忠除名勒傳送萬安軍編管初忠緣公
毆擊所部軍兵軍有致死既而聞府妻阿雀與其婿未
立謀欲復讎懼即令以毒藥殺二人於法應死特貸之
十二月五日詔成忠郎劉俊除名勒傳送利州編管以
俊謀殺郭漸不克法應絞特貸之十六日詔入內內侍
省東頭供奉官寄資武翼郎吳曇除名以曇主管建康
府行宮大內鍊鑪虛作客人中賣花木盜錢入已法當
絞特貸之二十二日詔臨安府徑山能仁禪院僧陸清

言決脊杖二十刺面配廣南遠惡州軍牢城以清言撰
造倡頌盡惑士庶至有指斥語言於法應絞特貸之二
十二年四月五日詔保義郎邢若思除名勒停永不收
叙送德慶府編管仍籍沒家財以若思前監廣州白石
場坐贓法當絞特貸之六月十日詔進武校尉殿前司
策選鋒軍使臣徐朝除名勒停送饒州編管以朝毆擊
百姓黃五三致死當絞特貸之八月九日詔秉義郎新
添差泰州兵馬監押趙不塾除名勒停今南安軍押送
大宗正司鎖閉以不塾前任本軍兵馬監押因與管界
巡檢張遠宴會戲謔發怒不塾毆遠限內致死法當絞
特貸之二十三年三月二十五日詔右迪功郎鄧行除

名勒停永不收敘送廣州編管仍籍沒家財以行前監
秀州新城市稅坐贓法應絞特貸之六月二十八日詔
入內內侍省東頭供奉官寄資修武郎裴詠除名勒停
送海外瓊州編管永不放還其初詠被旨往盱眙軍傳
宣撫問北使私市北貨尋被拘收心懷怨望有指斥語
言法當絞特貸之二十四年十二月二十一日詔右通
直郎知明州鄞縣程緯除名勒停永不收敘送貴州編
管仍籍沒家財以緯坐贓法當絞故特貸之二十五年
六月二十二日詔宜州觀察使殿前司選鋒軍統制權
發遣江南東路馬步軍副總管王升罷從軍今日下前
去之任饒州副劇男忠訓郎世雄特貸命除名勒停決

脊杖二十不刺面配邕州本城收管初世雄因赴武舉
不第心懷怨望撰造平治之書譏訕朝政反作詩有指
斥語言為楊名所告法寺鞠實故有是命二十六年六
月二十五日詔武翼郎楊暉承節郎王榮除名勒停永
不收叙暉送橫州榮送藤州編管各籍沒家財以暉前
權廣南經畧司準備將領監廣豐倉門榮前任五鎮巡
檢並坐贓法寺鞠實當絞是有是命二十七年九月十
四日詔前知處州鄒裊特免真決送吉州編管仍不收
叙裊乃浩之子以犯贓法寺准條合還毀出身以來告
敕除名勒停流三千里上曰所取贓是入已否沈誨曰
據案是入已上曰浩元祐間有聲譽其子乃爾既犯贓

法不當赦可特免真決故有是命三十年六月十九日
詔忠靖郎前監永康軍青城縣酒稅王楊特貸命追毀
出身以來告敕文字除各勒停送靜江府編管以楊任
內欠本軍酒課及酒務曆內虛收錢引及與娼妓踰濫
法守稱除罪輕該恩准條於絞刑合決重杖處死又稱
楊嘗有戰功故特貸之八月三日詔右從政郎前潭州
寧鄉縣令呂大壯特貸命追毀出身以來告敕文字除
名勒停送韶州編管大壯在任日令押錄於縣庫窠名
錢內妄作名色支用及與娼妓踰濫法寺稱除罪輕准
條於賊罪上斷合決重杖處死故特貸之 孝宗隆興
元年正月十六日詔右朝請大夫新知永州陸廣特免

真決除名勒停追毀出身以來文字不刺面配韶州牢
城仍籍沒家財坐前知滁州贓污不法為養老軍人經
御史臺陳告大理寺勘鞫是實故有是命也三十日詔
修武郎閤門祗候充御前神銳軍第五將張耘特貸命
除名勒停追毀出身以來文字免真決不刺面配惠州
牢城仍籍沒家財以耘差往漢陽軍屯駐欺隱樞密檣
杖手借請錢米入已大理寺定斷當絞特貸之五月六
日詔成忠郎前監秀州崇德縣酒稅郭世倫特貸命追
毀出身以來文字除名勒停永不收叙送藤州編管仍
籍沒家財以世倫在任私置文曆盜用官錢大理寺定
斷當絞特貸之二年九月八日詔降授敷武郎殿前左

翼軍權統制魏尚特貸命免真決除召勒停追毀出身
以來文字不刺面配韶州牢城坐在任減尅軍士錢糧
入已故有是命 乾道元年正月二十六日詔中衛大
夫貴州刺史建康駐劄御前後軍統制兼知壽春府頓
遇特貸命追毀出身以來文字免真決刺配吉陽軍牢
城以遇屯兵戍守邊郡金人未至奔城逃避緣嘗被受
宣諭司文檄特貸之二年二月六日詔武義大夫充殿
前司神勇軍訓練官王傑特貸命追毀出身以來文字
除召勒停送藤州編管以傑部轄官兵裝發馬草因問
百姓周二偕房宿泊其人不從傑乃用拳及鐵人毆打
致周二赴水而死故有是命十二日詔右宣教郎新通

判廬州龔時特貸命進毀出身以來文字除名勒停永不收敘免身決不刺面送賀州牢城收管仍籍沒家財以時前任江陰軍倉判擅支經總制及下綱磨費錢充修造等用及貸支官錢買和糴銀及勾牙人壇增和糴米價為知軍宋藻所發本路憲司鞠實以聞故有是命十七日詔降授忠訓郎前監軍激賞新北酒庫呂安行拊貸命追毀出身以來文字除名勒停決繫杖二十不刺面配韶州牢城收管仍籍沒家財以安行在任收受浮鋪貨屋錢入已并額外多破柴水夫腳錢及節次貸借官錢妄作修葺公廨支遣送大理并鞠勘悉得其實故有是命九月四日詔左從政郎前建康府上元縣令

李允升特特命追毀出身以來文字除名勒停決脊杖
二十刺面配惠州牢城收管仍籍沒家財以允升在任
日私於廳側置上庫拘收贓罰錢并諸色雜收官錢並
不附曆節次盜支入已大理寺定斷雷紱特貸之三年
二月二十九日詔右朝議大夫直秘閣權廣南東路提
點刑獄公事石敷義特貸命為癘老免真決追毀出身
以來文字除名勒停永不收叙刺面配柳州牢城以敷
義任廣東提舉日盜用鹽腳贓賞錢等入已及減剋鹽
亭戶鹽本錢買銀入已贓污狼籍為言者論列送大理
寺勘鞫得實故有是命五年五月一日詔右從政郎前
化州司法參軍趙戢特貸命除名勒停追毀出身以來

文字送欽州編管仍籍沒家財坐在任受納人戶役錢不書于曆皆收盜入已法寺勘鞠詣實合決重杖處死特貸之同日詔右朝請郎薛象特貸命追毀出身以來文字除名勒停決脊杖二十刺面配韶州牢城收管仍籍沒家財坐前任化州及瓊州日將軍資庫出剩銀錢及椿留買馬錢並撥人犒賞充非泛雜支及收買金珠香物並不還價錢法寺鞠勘詣實當贓罪絞特貸之九月二十四日詔右文林郎監明州昌國買納鹽場兼催煎張廣仁特貸命追毀出身以來文字除名勒停決脊杖二十刺面配惠州牢城以廣仁在任增秤亭戶鹽於亭戶單狀內添寫鹽數盜請官錢入已故有是命十月

十一日詔右文林郎前贛州會昌縣令韓元奕特貸命
追毀出身以來文字除名勒停送韶州編管仍籍沒家
財以元奕在任縱容胥吏並緣為姦違法科歛民錢入
已私役工匠不支食錢數買綿帛虧減價直大理寺定
斷當重杖處死特貸之六年五月二十七日詔右朝散
郎前知潮州曾造特貸命追毀出身以來文字除名勒
停送南雄州編管仍籍沒家財以造在任日贓污不法
為漕司所劾繼而臣僚論列故有是命七月十四日詔
武節郎前監吉州在城商稅張綰特貸命追毀出身以
來文字除名勒停永不收叙送韶州編管仍籍沒家財
坐在任受稅務諸門津押厝錢及除減官稅錢分受入

已大理寺斷雷賊罪絞特貸之九月十七日詔成忠郎
孫尚特貸命追毀出身以來文字除名勒停決脊杖二
十刺面配蕪州牢城收管仍籍沒家財以尚被差押市
舶司籠色香藥綱赴行在交納將胡椒盜拆官封出賣
錢銀等物侵盜入已大理寺斷合決重杖處死特貸之
十月十八日詔武翼大夫前權發遣橫州皇甫謹特貸
命追毀出身以來文字除名勒停決脊杖二十刺面配
梅州牢城收管仍籍沒家財以在任受賂及侵盜官物
入已故也七年正月二十一日詔武翼郎閻門祇候建
康府屯駐官薛千虎特貸命追毀出身以來文字除名
勒停送連州編管以千虎用錫板偽造官會行用大理

寺鞠寶當重杖虎死以千虎嘗立戰功特貸之八年九月十七日詔右從事郎專一指置處州庫山等處銀場管隼特貸命追毀出身以來文字除名勒停決脊杖二十刺面配連州牢城仍籍沒家財坐將銀場折合銀收盜入已銷錢為銅以應官課朝廷遣大理寺丞吳淵即處州置勘得實大理寺定斷合決重杖處死特貸之十月十六日詔保義郎孫文亮特貸命追毀出身以來文字除名勒停決脊杖二十送韶州編管仍籍沒家財坐任臨安府緝捕使臣部下捕獲偽造官會人文亮將特鴆設錢收受入已大理寺定斷合決重杖處死特貸之十一月十二日詔忠翊郎石永寧特貸命追毀出身以

身文字除名勒傳送潭州編管以永寧管押臨江軍米
綱從綱稍盜米及自入已大理寺定斷當絞特貸之十
二月三十日詔忠翊郎趙善詒特貸命追毀出身以來
文字除名勒停永不收叙送南外宗正司廋訓訖鑲閉
永不放還以善詒因造私酒酤賣為所由所捕乃用斧
斫死所由大理寺定斷當死特貸之九年三月二十八
日詔右宣教郎權知英州吳名世特貸命追毀出身以
來文字除名勒停永不收叙送藤州編管仍籍沒家財
坐在任收受金銀及詭名請兵士借請入已大理寺鞫
勘得實故有是命 淳熙二年三月一日臨安府大理
寺奏北界姦細張弼張禹案上曰可脩所招情款牒還

對境彼遺姦細未為我所得曲在彼今遣還之使知愧
宰臣葉衡等奏此誠足以示陛下威德但張弼累次往
來刺深罪犯與張禹不同上曰張弼今依法施行只張
禹保還九月十四日詔南安軍司戶參軍蔡大廉特貸
命除名勒傳送化州編管永不收叙時茶寇自吉州犯
南安軍上猶驟畧遣臣錢佃妻大廉應辦鄂州都統解
彥詳軍馬錢糧廉以妻產難乞給假有誤軍期法當處
斬特貸之十一月十六日詔儀鸞司看管官物人石安
王進各特貸命夾脊杖二十刺面配二千里外州軍以
大內人石安王進輪當守宿法寺奏並當死緣係積油
火致火故特貸之四年三月四日詔敕武郎監通州買

納鹽場張孝寬特貸之追毀出身以來文字除名勒停
永不收叙送郴州編管仍籍沒家財以提舉鹽事官奏
劾孝寬與吏並緣為姦盜用官錢入已鞠得其實故有
是命六年六月十二日大理寺奏強盜案內八名當斬
三名當重杖處死上曰三名所坐稍輕正當大暑不欲
多殺可貸其死八年五月二十七日詔平江府司法時
亨祖特貸命追毀出身以來文字除名勒停送筠州編
管仍籍沒家財以亨祖在任燕常平庫節次貸常平
頭子坊石錢私用故有是命九年正月二十四日詔軍
人詹保持特貸命決脊杖二十刺面配海外州軍牢城收
管永不放還保先因毆死葉先貸命配道州赴竄歸庸

顧張彥文家因趙汝諧醉酒執刀欲殺彥文保勸止之併欲殺保保遂以木檐打汝諧右足致死法司擬罪當寺後者言保冒不測以救顧主之死本無殺汝諧之心據其所為猶是果義故貸之十年閏十一月六日前知信州鉛山縣蔣德特貸命除名勒停免真決不刺面配惠州仍籍沒家財以侵盜官錢入已故也十二年十一月二十二日南郊赦諸路州縣見追積年官賊并捉獲私茶鹽酒賭匿稅商販違禁之物及應犯罪合追贓備賞并以官錢代充之人如委實貧乏或已不存無可催理見行監錮家屬并干繫人各下均攤備贖及監司州縣一時增立若特立賞錢或已籍沒家財外有追理未

足之數無可送納或見在配所除剋請給並將與蠲放

仰州縣多出文榜曉諭

十五年明堂赦同

同日赦應命官本犯

係公罪在任不曾經取勘及已去官監司州軍不驗照

去官條法輒差人追捕拘繫赦到日並與釋放

十五年明堂赦

同日赦應官員諸色人犯罪赦後尚合收坐及猶應

勒停僧道還俗之類如非情理深重及因事干連案後

收坐公罪管杖之人特依今赦放免

十五年明堂赦同

十四年

三月八日詔南康軍民婦阿梁特貸命決脊杖二十送

二千里外州軍編管刑部尚書葛邲言阿梁因與葉勝

同謀殺夫程念二葉勝身死在獄今已九年節次翻異

九十差官勘鞫已降指揮處斬既差官審問又行翻異

復差江東提刑耿延年親勘今延年申請程念二元係
葉勝殺死阿梁初不同謀與前來十勘不同今若便以
提刑司所勘為據則十次所勘官吏皆合坐以失入之
罪干連者祇以一人所見而易十次所勘事亦可疑若
不以提刑司所勘為據則又須別差官再勘葉勝既以
瘦死獄中阿梁得以推托淹延歲久追逮及於無辜委
是有傷和氣竊謂九年之獄十官之勘不為不詳矣而
猶有異同則謂之疑獄可也夫罪疑為輕則阿梁當貸
死既不死則所有前後推勘官吏亦難坐以失入之罪
乞自聖裁故是貸之十五年九月八日明堂赦在法違
欠茶鹽錢物止合估欠人并牙保人物產折還即無監

繫親戚填還及妻已改嫁尚行追理之文昨令戶部申
嚴行下許人戶越訴訪聞人戶欠負客旅及店鋪價錢
緣係推貸有已經估籍家產償還不足依舊監繫及逃
亡死絕又行監繫牙保人等率聯不已可並與除放毋
致違戾 紹興元年正月二十八日詔前知秀州華亭
縣劉璧特貸命追毀出身以來文字除名勒停永不收
叙免真決不面刺配贛州牢城收管仍籍沒家財坐在
任盜縣庫錢入已及受部民賄賂法寺鞠實故也六月
十四日詔前知金州秦嵩特貸命追毀出身以來文字
除名勒停送潭州編管仍籍沒家財是日上御後殿宰
執劉正等進呈嵩案上曰賊污實跡如此之多豈可輕

怨劉正等言嵩罪在不貸但向來亦有戰功例須簿減
然亦當除名編管上曰如是足矣八月十五日宰執進
呈臨安府奏審洪知言斷罪上曰張杓欲杖脊黥配罪
不至此却以太重不用蔭真決編管足矣知言本臨安
府術士守臣張杓奏其平日憑恃口吻專以欺詐為生
前後過惡不一乞不以蔭決配故也二十五日宰執進
呈知平江府來說友奏乞將閻儀貸命上曰罪疑惟輕
既有所疑豈可不貸先是說友奏平江府所勘閻儀打
死孫十三事其罪有可疑者故也三年七月二日詔前
監文思院上界常良孫特貸命追毀出身以來文字除
名勒停永不收叙免真決不刺面配萬安軍牢城收管

仍籍沒家財以良孫在任日節次盜造作金銀入已因
提轄林復覺察棘寺追勘得實以家世之故特貸之十
三日詔知嚴州葉籌特貸命追毀出身以來文字除名
勒停永不收叙免真決刺面配遠州牢城收管仍籍沒
家財坐在任將公庫錢盜支入已先是臣僚論列令浙
西憲司勘鞫得實宰執奏其年老不任真決上只令刺
配十九日宰執進呈成州奏勘到北人王臯為過界叔
盜西和州管下血厚家財物殺死捕盜人王仲刑部擬
王臯合斬刑上定斷萬却奏曰且令土牢拘管陳駸奏
曰若此等人不知拘留為是且牒還為是上曰令牒還
對境亦示我包容之意四年七月十三日詔修武郎石

大協特貸命除名勒傳永不收叙免真決送潭州編管
仍籍沒家財以大協添差監建昌軍在城酒稅因附押
牙稅免丁等窠名錢赴行在沿路盜貸入已棘寺鞠實
法當死係陳國大長公主孫特貸之五年二月七日詔
陸材特貸命失脊杖二十刺面配廣南州軍牢城收管
先是平江府奏勘有蔭人陸材拈輒還搏從叔父陸濟
致死法寺定以杖死奉聖旨陸材特貸命真決不刺面
配廣南州軍本城收管既而臣僚繳奏故有是命 紹
熙五年九月十四日明堂赦應命官在貶所物故可自
今赦到日仰所在州軍勘檢詣實許令從便歸葬訖保
明具申省部若元犯事理重者申取朝廷指揮閏十月

一國六部書

卷

二十一日知臨安府來說友言乞將本府見行項固拘鎖乏人如元係配隸者即押回元配所如有強壯者即照淳熙十年五月內本府已承指揮與分刺屯駐軍其餘皆連各人家屬分押出本府隣州界庶幾姦盜有自新之路無終囚之苦詔令臨安府將見管賊人各差人管押分送外州軍牢固拘管月具存在申三省樞密院既而有旨除所犯五次以上并刺配之人仍舊拘管外餘並放令逐便不得入臨安府界慶元六年五月六日中書門下省言近日祈禱雨澤檢會淳熙十四年八月二十六日敕應諸路州軍一時監司守臣特判編管之人並仰逐路提刑取元斷由子細詳覆除情理重害

應得條法許仍舊外其他于條不應編管而編管者並
令一面給據疎放具已疎放人數申尚書省照得上件
指揮行之歲久近來州郡全無申到已放人數情節竊
慮奉行不虔理合檢舉詔令諸路提刑司照應已降指
揮常切覺察或有似此違戾去處按劾以聞 嘉泰二
年十一月十一日起居郎兼權刑部侍郎林采言嘉泰
改元一全年天下所上死案共一千八百一十一人而
斷死者總一百八十一人餘皆貸放夫有司以具獄求
上必皆可議刑之人蒙陛下貸其非辜者凡一千六百
三十人豈謂細事欲令秘書省修入日曆上以示陛下
好生之德下以戒有司用刑之濫從之三年十一月十

一日南郊赦文刑獄驪異自有條法不得於詞外推鞠其干連人雖有罪而於出入驪異稱冤情節元不相干者錄訖先斷近來州郡恐勘官到來臨期勾追遲緩却將干證人盡行拘繫破家失業或至死亡可並令釋放著家知在如違許被拘留人經監司陳訴開禧二年嘉定二年明堂如赦之又赦文應命官本犯係公罪在任不曾經取勘及已去官監司州軍不檢照去官條法輒差人追捕拘繫赦到日並與釋放開禧二年嘉定二年明堂如赦之十五日詔韓林係勲臣韓世忠親孫久在責缺有可放令逐便三年三月二十六日吏部尚書兼給事中陸峻兵部尚書宇文紹節吏部侍郎兼直學士院衛涇工

部侍郎兼知臨安府趙善堅龍圖閣侍制在京宮觀奉
弄疾吏部侍郎雷孝友戶部侍郎梁季珖林祖洽禮部
侍郎兼刑部侍郎史彌遠大理卿李訖太常大卿兼權
直學士院兼權中書舍人兼樞密副都承旨田澹大理
少卿吳士遜起居郎趙夢極起居舍人許奕侍御史徐
枏戶部侍郎兼刑部郎官費培左司諫朱質右正言葉
時監察御史王益祥喬夢符宗正丞兼權刑部郎官周
震大理正史厚宗大理寺丞沈紡大理評事權丞林大
章大理司直兼評事王益之大理寺主簿兼評事施棫
大理評事鮑潯之趙時適翁濟鮑華沈實狀奏逆曦就
戮族屬悉當連坐恭奉聖旨令臣等集議合得刑各聞

奏臣等竊詳反逆議罪父子年十六以上皆絞伯叔父
兄弟之子合流三千里自有正條外所有十五以下及
母妻妻祖孫兄弟姊妹姪無罪名律止沒官比之伯
叔父兄弟之子服屬尤近即顯沒官重於流三千里蓋
緣坐跌官雖貧而不死世為奴婢律比畜產此法雖存
而不見於用其母女妻妾子妻妾祖孫兄弟姊妹合於
流罪以上議刑竊緣上條所載止謂謀反疏文云臣下
將圖逆節者設今來吳曦建號稱元備極僭擬反逆已
成上條未足以盡其罪伏乞睿斷施行詔吳曦叛逆族
屬悉合誅戮朕念其先世不忍夷滅除曦妻男並次重
杖處死外其男年十五以下并女反生子之妻並分送

二廣遠惡州軍編管內女已出嫁者免親兄弟有宜人
除名勒停應吳璘位下子孫並殺徙出蜀分往湖廣諸
郡居住吳玠下子孫與免連坐通主吳璘墳廟祭祀
令四川宣撫制置司取見服屬官職照應施行訖聞奏
二十七日四川都大茶馬吳玠言逆賊吳曦不遵臣節
上負國恩下隳家世臣與閭室罪當萬坐謹同男昭等
伏闕待罪詔吳玠落職放罪并吳昭等並照應已降指
揮於湖廣州郡居住五月二日權四川宣撫使安丙言
逆臣吳曦罪當赤族丙以吳氏三世為將其族甚大吳
玠下諸房素與吳玠父子不相往來雖吳璘下諸子其
間亦有與吳曦絕迹不相交者若依法一槩誅戮懼有

傷聖天子好生之德恭承詔免其吳曦一門附於逆黨者並加誅戮其餘協從置而不問今具列吳曦一門當行誅斬其他異居族人當與原免者各具姓名如後一吳曦二子已斬首號令一吳玠係曦之堂弟受曦偽命為侍中兼司農卿一吳玠係曦之父挺同胞兄弟一吳曉係曦同母弟曦僭號之後除集英殿修撰知興元府克利州東路安撫使一吳玠係曦之親弟已上六人並已斬首號令其他婢妾等已分送諸軍嫁與軍兵去訖一吳玠妻係勲臣其諸孫與兵曦不協一吳挺異母兄吳總舊與挺不和在孝宗皇帝朝摠管於御榻前累曰以挺之權太重異時有變臣乞不坐此言中外之所共

知一吳挺異母兄吳廣已死廣之妻係宗女清節凜然
曦僭竊之後以書召之斥曦所遣人曦有親戚畔之
之語一吳挺異母弟吳玠已死玠之妻劉氏聞曦僭號
吼罵曦三日暮夜號哭曦遣人扶出掩門不許再入一
吳挺異母弟吳玠已死止有一孫幼小素不為曦所齒
已上五房雖在法不可免而其情則可矜中心昭然欲
乞特與原貸施行詔除安丙已施行人外餘並照三月
二十六日已降指揮施行吳玠依舊責授團練副使特
許於湖廣州軍從便居住九月十七日端明殿學士知
沔州兼四川宣撫副使丙而言契勘逆曦僭叛在法當
誅夷三族聖恩寬大念其先世保蜀之勲並特貸命止

流徙湖廣州軍居住所有家產如吳摠吳拭皆仍令收管合得租利之屬止是吳挺係職之父此一房田業自當籍沒此外吳璘位下諸房子孫朝廷雖已降指揮流徙湖廣居住緣其人皆富貴膏粱之人不辦裁奪一出蜀口必填溝壑臣今仰體朝廷忠厚之意欲乞將吳璘位下子孫田產除吳摠吳廣兩房俱有子孫可以給付吳拭妻劉氏見存無子孫俱與充籍沒外其餘人皆癡庸病風之人欲乞指揮免行流徙出蜀止分送潼川府夔州路州軍居住依歸朝人體列與計口支給廩粟俾可自存所有本分田產及諸房應關外四州田併用招集民兵止從宣撫司更各人與支給行錢三百貫令往

夔州潼州略州縣任便居住庶幾子孫免溝壑之患
詔劉氏趙氏並照已降特免遷徙指揮施行餘從之十
二月六日御史中丞雷孝友言嘗觀漢誅梁冀而張綱
條其無君之心十五事以韓侂胄而視冀所為其罪惡
蓋有加焉謹條列而言之侂胄恣情專擅凡所欲為不
復奏稟偽作御筆批出同列憚其權勢不敢爭執此其
無君之心一也廟堂以徐邦憲嘗請建儲欲召用之侂
胄駕言上怒未已每輒沮止不知其意安在此其無君
之心二也機速房乃軍國要密之地而輒置於私第凡
所調發與群吏為密廟堂不得與聞此其無君之心三
也金字牌合自御前給降而擅留于私家凡所遣發未

嘗關白于上此其無君之心四也周筠本佞胄僕廝乃
作恭淑皇后親屬補授此其無君之心五也蘇師旦乃
佞胄書吏而階銜輒帶隨龍此其無君之心六也寢室
上下四圍皆用羅木如木圍之制此其無君之心七也
諸婢房閤皆官禁之物各有內中鐫記此其無君之心
八也搜索其家有北界榜文三紙逆曦偽蜀榜文一紙
皆不以上聞此其無君之心九也壽慈宮錢物寶玩佞
胄皆先用掌記抄錄擇其所欲盜歸私第其餘偽作太
皇太后分賜此其無君之心十也佞胄罪惡所宜肆諸
市朝與眾弃之陛下曲為容貸俾其全軀又活其孥而
天下之人但知稱兵首亂殘民誤國至其蓄無君之心

有如此十事者或未盡知乞下臣此章播告中外使咸知侂冑負滔天之罪而陛下聖度優容如此以詔天下來世從之 嘉定二年五月十三日詔羅日愿欲狂妄作過已送有司勘證處斷訖其奸黨親屬並令照法移徙外或有誣誤誘協人未發覺到官更不追究令尚書省給降黃榜曉諭三年正月八日詔准東湖南江西三路節次申奏盜賊作過皆緣權臣妄開兵釁科擾頗仍斷以旱蝗州縣失於存撫是致姦民倡率嘯聚貽害縣鎮良軫朕懷除非作過賊首合行收捕外其餘協從人等並從原貸許以自新各令復業仍仰州縣多方賑恤十五日詔楚州衡彬吉州南安軍等處盜賊作過除賊

首合行收捕外其餘協從等人如能鮮散歸投並從原貸各令復業許以自新仰州縣多方賑恤四年十一月二十八日詔承信郎王從龍特貸命夾脊杖二十刺面配泉州左翼軍重役使喚仍追毀誥命以從龍招安黑風峒羅孟二等受賊賄貸以來資給之及受李元勸書佯敗而走法守言在律合斬雖皆疎決非雜犯之比亦當處以死刑詔特貸之八年十二月三日臣僚言邇者畢再遇周虎莊松輩盜請錢米銀兩罪狀顯著聖心寬恕以其守禦微勞止從銷秩略行追索僅移所居旋令自便昔漢魏尚為雲中守厥功茂矣上功首虜差六級文帝下之史削其爵不次貸夫再遇等區區之功何足

比魏尚而尚以私錢饗士視再遇革勅士卒錢以自私
萬萬不侔文帝用法則如彼陛下用法止如此臣知陛
下措心積慮拳拳念功過文帝遠甚乞下此章播告天
下繼今如有賊敗自從本條更不為例庶幾中外知寬
恩不可倖得成法所宜遵守從之

宋會要 禁囚

國朝獄官令禁繫皆輕重異處囚家送飲食獄官檢視

即時付與無使減節滯留若囚死罪初祖起賊在禁五

軍人及將校婦人及流以下去祖婦人在禁皆與男夫

日夕防守杖罪散禁若隱情拒抗八十以上十歲以下及廢疾

懷妊侏儒之類雖犯死罪亦散禁太祖開寶二年五月

十一日詔曰扇暍泣等事前王能事恤刑緩獄有國通

規朱夏既臨溽暑方盛暍茲縲繫深用哀矜宜令有司

限詔到其囚人枷械圍圍戶庭長吏每五日一次檢視

灑掃務在清潔貧無所自給者供飲食病者給醫藥小

罪即時次遣重繫無得淹滯太宗太平興國七年五

月九日知相州張仲容言諸州兵馬監押郎幕使臣等或因小事直送百姓軍人赴所司禁繫皆不牒報欲望自今先具罪犯申本州詳酌事理禁留從之 九年三月三日詔自今天下繫囚依舊例十日一具所犯事因收禁月日申奏其間留寄禁店戶將養保明出外知在並同見禁人數仍委刑部糾舉如事理可斷及事有小虛有禁繫者本處官吏重行朝典人吏仍勒停配重處色役奏禁人數不以實及淹延日月當密行察訪許人告 雍熙三年二月十二日左拾遺張素言諸州縣繫囚動經旬月迄今自今諸縣鎮禁繫不得過十日仍令本州長吏察訪從之 四月四日詔諸道州府凡禁繫

之所並須灑掃牢獄供給漿飲械繫之具皆令潔淨疾
者為致醫藥無家者官給口糧小罪即決遣大罪審辯
其情無致淹延至是_四每歲首夏下詔書如此例
至道德三年二月令京城諸司不得專械繫人真宗
咸平三年六月十三日詔曰朕亭育萬方哀矜庶獄民
或多僻義在正刑而方屬炎蒸深憂繫滯仍慮理直者
不能有辨情輕者或_四禁錮縲絏之中飲食失所時行
告諭當體朕懷宜令兩京及諸路見禁罪人有罪輕者
不得禁留旋為踈理徒罪以上疾速勘斷無致淹延
四年二月二十六日知黃州王禹偁上言病囚院每有
患時疾者牙相浸染或致死亡請自令持伏劫劫賊徒

流以上有疾即於病牢將治其聞訟戶婚杖以下得情
款者許在外責保看醫俟痊日區分從之 五年八月
二十七日詔四排岸司繫囚無親屬者量給薪米仍速
裁斷 景德三年七月一日詔曰應禁勘盜賊要長吏
鈐轄無令妄引徒伴以時飲食有疾者醫治之仍分輕
重男女別房禁繫時上封者言盜賊多緣私憾妄引無
辜官司因而追擾又重禁者拳手令小兒哺食多受饑
渴不問所犯大小同繫一牢帝憫之故詔誠諸道焉
九月二十六日詔陝西諸州納質院戎人並放遣之先
是蕃落每為寇盜既經和解所在慮其復叛因置此院
收其子弟有壯年禁錮至白首者帝聞而憐之特有是

命 大中祥符四年十月三十日詔訪聞天下司理院
州院罪人獄死者皆司理叅_軍與州曹官迭差檢驗慮
相庇蓋自今須選差不干礙刑獄官依公檢驗 五年
十二月二十八日河東路提點刑獄張懷寶言伏見諸
路大辟罪皆俟旬終報轉運提刑司若旬初路遠即禁
囚動經半月或有情款疑互審察不及自今望令即日
報兩司從之 六年十一月四日詔諸州所供禁囚犯
由其命官居禁及責保叅對者悉以所犯別狀申奏初
諸道通為一奏至有命官犯輕讞同於重獄者帝以非
便命刑寺議故有是詔 八年二月詔開封府命後應
命官合該勘鞫未得追禁奏_候後指揮 五月詔開封府

應禁罪人並置印簿抄上緣身衣物拘管候斷放日給
付銷簿獄內不得置紙筆硯瓦每遇夜有未結絕罪人
監送下禁早晨引領赴府並差職員部押緣路不得與
外人言語亦不得於店肆暫住如違勘罪嚴斷 九年
四月二十三日詔三京諸路大辟罪獄既具而非理致
罪死者委糾察提點刑獄官察之 天禧元年十一月
開封府言左右軍巡見禁勘罪人今值冬寒若不問輕
重須候結案必恐淹延欲望許除大辟罪依舊結案外
其餘流罪以下公事止依在府勘事體例寫狀具劄
子繳連錄問後送法司定刑名斷遣從之 四年十二
月詔自今每軍巡院禁繫情理兇惡重罪人數稍多即

從府司牒殿前或馬步軍司逐院選差兵士十五人員
僚節級各一人寅夜防護候斷訖即放歸營 仁宗天
聖二年十一月二日臣僚上言御樓賜赦見禁罪人並
於樓前釋放支賜綿袍頭巾麻屨今詳釋罪已是厚恩
望別定制詔自今後所給衣物須罪人在禁一月以上
委是貧不濟者即給 四年正月糾察在禁_京刑獄司言
左軍巡勘咸平縣賊姜則為累行打劫錄問並無翻異
其人手指凍落九指歆乞今後令當職官吏躬親勒醫
人子細看驗如有疾患瘡病鈐轄獄子醫人看承醫療
從之 八年五月詔大辟公事自今令長吏躬親問逐
然後押下所司點檢勘鞫無致偏曲出入人罪若依前

違慢致有出入信憑人吏擅行考決當重行朝典時感
德軍司理楊若愚不申長吏考決無罪人駱憲等加石
械上若愚特追一官典押獄卒各刺配因有是詔 六
一詔開封府言準律諸主守不覺失囚者減囚罪二等
若囚拒捍走者又減二等皆聽一百日追捕自來失囚
依條給限監捕限滿不獲方行決斷內有減至杖罪者
若便行斷遣又礙律文須至一例給限伏緣京畿諸縣
亦有失囚若不分重輕一例監捕頗復淹延欲乞自今
在京及府界諸縣應失囚本非固縱依律減至杖罪以
下者便行決遣更不給限所走罪人散行捕捉從之
十年正月二十一日詔諸州傳囚若所過未差捕送人

住日續其口糧不得過三日 明道二年六月九日中

書門下言天下配隸罪人禁奏待報者甚衆既淹牢禁亦煩裁決宜委有司參酌當取旨者減其等著為定法以省奏請之煩詔權御史中丞范諷天章問待制王黼秘閣校理范仲淹與審刑院大理寺主判官同詳定以聞 景祐元年五月二十七日左司諫姚仲孫言天下郡縣禁囚或稱繫死獄中者請令徑報提刑轉運省察詔諸州軍刑獄禁罪內不因疾患非理致死者提刑常切體訪覺察出榜曉示許人陳告委是故行殘虐勘鞫事理不虛告事人與支賞錢一百千以係省錢充公人與轉一資同犯首告者與免罪仍轉資支賞 慶厯七

年三月七日河東轉運司言近年郡國刑獄中罪人多
是禁繫連月飲食失所及拷掠而死上下隱庇檢驗時
祇以病患為名欲望令轉運提刑司每巡歷至州縣先
入刑獄中詢問罪人其有禁繫人身死仰畫時具檢驗
狀申二司點檢如情理不明有拷掠痕立便取索公案
差官看詳依公施行從之 皇祐二年三月二日_{十日}六日
廣南東路提點刑獄席平言準敕職制條每州旬具本
州及外縣禁繫并隨衙門留保管出外人數開坐犯由
禁日次第供提刑點檢又斷獄條諸縣每旬具禁數犯
囚斷遣刑月日申州點檢如可斷不斷小事虛禁淹延
不實並令舉勘更不開坐諸縣人數竊詳二條職制則

具州縣禁數斷獄則不發人數未委如何遵守詔付法
寺法寺言欲依景德四年景祐四年勅每旬具本州字
下外去縣字餘如舊條施行從之 英宗治平二年二
月七日開封府言軍巡院見禁杖瘡未損逃走軍人乞
責付所轄去處監防執役依疾病之例日給口食肉羸
瘦未任功役者亦與口食委官司鈐轄如法造致供給
將理不得減尅今後如此類並乞準例從之以上國治
平四年十二月二十二日神宗已即位未改元詔夫獄者民命之
所繫也比聞有司歲考天下之奏而瘦死者甚多竊懼
乎獄吏與奉法者旁緣為姦檢視或有不明使吾元元
橫罹其害良可憫焉其具為令應今後諸處軍巡州司

理院所禁罪人一歲內在獄病死及兩人者推司獄子
並從杖六十科斷再增一名加罪一等至杖一百止如
係五縣以軍州每院歲死及三人開封府司軍巡歲及
七人即依上項死兩人法科罪加等亦如之典獄之官
如推獄經兩犯即坐本官仍從違制失其縣獄亦依上
條若三萬戶以上即依五縣以上州軍條其有司若不
依條貫者自依本法仍仰開封府及諸路提點刑獄每
歲終會聚死者之數以聞委中書門下點檢或死者過
多官吏雖不科斷更加點責 神宗熙寧元年六月三
日詔今後四京及諸路州軍旬禁犯囚並限一月申發
諸縣申本州者限十日 十月二日詔諸處禁繫罪人

慮冬寒有失存恤在京刑獄司及諸道委當職官吏應繫人獄房常給柴炭務令溫暖製造衲襖袴并衲襪手衣權給與闕少衣服罪人及所供飯食無容司獄作弊使囚人凍餒以致疾患仍委長吏逐時提舉哲宗元祐七年十二月四日詔應獄死罪人歲終委提刑司在京委御史臺取索具姓名罪犯報刑部數多者申尚書省八年二月五日中書省檢會元祐五年五月二十五日指揮諸路開封府界提刑司每歲終具諸獄瘦死人數仍開析因依申刑部內數多者申尚書省在京禁繫委御史臺取索報刑部看詳上件朝旨即無許分別禁繫人數自至元祐七年諸路具到獄死人數刑部遂

分每禁二十人以上死一人者更不開具即是今後應
繫囚處歲禁二百人許破十人獄死深慮州縣獄官公
然懈弛甚非欽恤之意詔刑部今後更不得分禁繫人
數依元降朝旨將瘦死人數多者申尚書省 紹聖元
年七月九日浙江南東路計度轉運副使周之道言昨
領刑部職事竊見府界諸路刑獄司見勘命官等公事
自紹聖元年以前尚有二百餘件乞下府界諸路提刑
司具入禁年月日見禁人數及未結絕者依申刑部依
條限舉催有故留滯者許奏劾詔令刑部立限過限即
奏劾餘從之 徽宗大觀二年十二月十八日上批比
閱刑書因考繫式一事不備則案不如式然罪有重輕

人有衆寡人衆罪重已該極刑則其輕罪不當追證如
會問逃軍之類軍狀未至餘人久繫不得結斷是以輕
罪妨重罪以重罪待輕罪行獄之繁良以此歎甚非先
王欽恤之意可自今勿俟輕罪免其追證庶無留獄
三年五月七日中書省勘會正當時暑竊慮刑獄淹延
枝蔓詔在京委刑部郎中及御史一員京畿并諸路州
軍令轉運提刑提舉常平司分頭點檢催促結絕見禁
罪人內于照人及事理輕者先次斷訖奏京畿徒以下
罪事狀分明不該編配及合申奏公事或雖小節不圓
不礙大情並許一面結決斷訖奏杖以下應禁者並與
責保知在除在京外有事故不能親行即選官前去仍

具每到處及月日事故因依徑申尚書省 政和二年
二月七日臣僚上言竊聞遠方郡邑官吏多輕視獄囚
不盡書歷雖在法有一百之罪深怨未盡遵承及門留
知在亦多不書致監司無由檢察遂成留滯欲乞州縣
獄囚并門留知在敢不書歷者除本罪外量輕重立法
特行黜責仍先委監司常切檢察庶無留滯之弊詔可
令刑部疾速遍牒諸路監司鈐束所部如有不法去處
即按劾奏作檢舉申明行下 三年七月二十三日大
理寺丞郭異求奏應刑獄官司寄禁無人供送飯食之
人依正禁人支破或乞減半支給詔減半支破 十二
月八日臣僚上言竊見遠方官吏於文法既疎於職事

亦怠故刑罰失中民不能無冤積日累久得無傷陰陽之和虧仁厚之政願委耳目之官專一分錄所部見禁囚遇有冤抑先釋而後以聞歲終較所釋多寡為之殿最其徼功故出有罪者論所法詔依奏仍令刑部立法四年八月十七日權發遣京畿提點刑獄公事林麓奏乞應今後獄司取會獄事其承受官司再催不報故作不完者並令獄司除申所屬官司施行外在京徑申御史臺在外申提刑司依法案治從之 十二月十四日刑部郎中李緯奏諸路奏案凡承勘結絕入遞雖有程限然州郡尚或因循淹滯囚繫至有結絕後數月方入遞者欲乞今後諸路奏案並令寺點檢如有稽留摘其

甚者上之朝廷下之有司依法勘劾施行從之 五年

六月二十二日開封尹盛章奏陳御筆時當大暑應兩

獄繫囚催督限日近結絕所有已未上朝廷斷遣公事

欲乞候案上共限三日斷下如有續上公事亦乞依比

詔依奏限三日斷下無致函莽 六年正月二十五日

刑部尚書慕容彥達奏會勘奏案等專條入遞後限一

日以申奏姓名日時引號牒進奏院如承本院報未到

者別錄以聞仍稱說再申奏事因入遞牒會依上法凡

此以防遺滯欲使繫囚早獲決遣臣竊見諸州從前多

不舉行上條其未到進奏院亦無文籍拘催今欲乞諸

州不依限牒會依案申詳覆違限條科罪仍令進奏院

置籍以時催促俟別錄到房許勾銷庶幾有以檢察不
至留獄從之 閏正月二十三日刑部員外郎李揆奏
應縣鞠強盜追贓已至罪止或別有重罪不礙刑名者
許先解州結斷續追餘賊庶獄無留滯從之 宣和元
年二月六日舒州言據從仕郎司兵曹事兼管左推勘
公事田泰靖言竊以禁囚有無人供食在法許令官為
造給其間有病患之人理合改造粥食調理緣請到官
米多是經年陳次米斛難以製造粥食不免旋行充換
新色白米造食供給仍監勒醫人用藥醫療乃獲痊安
詢究得以前並不曾如此改造飲食至於損失人命者
往往緣此蓋條內別無許令改換別色飲食之文遂致

刑獄官司無以遵守按部之官亦難檢察今欲乞申明
朝廷應病不應責出而無人供食者據應給米充換新
色白米改換粥食獄官躬親責給罪人食用從之 二
年正月二十六日尚書右司員外郎翁彥深奏伏覲陛
下欽恤庶獄四方大辟疑者以聞輒為未減而州郡不
能審克吏乘為姦邦刑所加多貧人子罕及富民觀其
奏牘之首脚色纖悉備載而畧其戶等高下不為無意
乞應奏裁並著等第察其弊者顯懲一二從之 三年
二月二十三日詔應江東兩浙路諸州申奏到見禁待
報公案大理寺大案十日中案小案限五日刑部大案
限五日中案小案限三日上省候賤平日依舊其應已

申奏公案干證無罪人如官司違法留禁仰監司點檢
覺察按劾施行四年六月八日臣僚言州縣刑監本以
戢姦而官吏或妄用以殺人州郡猶以檢制而縣令惟
意所欲淹留訊治垂盡責出不旋踵而死者實官吏殺
之也乞依在京通用令責出十日內死者驗覆如法重
者奏裁輕者置籍歲考其不應禁而致死者亦奏裁從
之 十二月二十四日詔應在禁罪人官司避免檢察
官點檢輒私他所者以違制論許被禁之家越訴仍委
監司廉訪使者覺察 五年六月二十日刑部奏檢會
臣僚上言伏覩州縣鞠獄在法不得具情節申監司及
不得聽候指揮結斷此蓋朝廷欲使州縣盡公據實依

斷遣不得觀望且使獄刑無淹延之弊而比年以來諸路監司往往狹情偏見每有公事必使州縣先具情節申稟聽候指揮方得斷遣稍未如意即再三問難必快其欲而後已臣愚欲乞特降睿旨補完見行條法應因在禁如監司指揮具情節及令聽候指揮結斷者州縣不得承受一面依條施行如監司見得果有情弊及情理未盡即別行按劾勘會上件事理刑部每半年一次檢舉行下條一時指揮自合遵守施行若監司於所部刑獄令承勘官司稟受推鞠已有政和勅科罪又近降御筆因在禁如監司指揮具情節及令聽候指揮結斷者以違制論仍令監司廉訪使者互察既互察在監司

合坐違制之罪即隨事朝廷自有特旨黜責不須更行立法欲下諸路監司州縣遵守近降御筆處分施行詔依如違以違制論_刑六年正月十二日提點京東路_刑獄公事孟特奏準刑部符承上項敕本司係專一檢察_刑獄稽違如有情犯可疑或事干非常理合要見所犯情由檢察未審合與不合隨時取會看詳依條施行大理寺叅詳提刑司既係專行檢察刑獄若實有情犯可疑或事干非常理合要見情由檢察即合隨事取會尚書省言應干禁囚監司並不合令聽候指揮結斷外其不許令具情節謂本司送下公事或干涉逐司妨礙詔令刑部申明遍牒施行七年四月十一日尚書省言罷

獄子等不行重祿深惟獄吏切於囹圄故立重法以馭姦猾今緣小費開其枉法合復獄子重祿罷諸囚在禁病死歲終保明條不行獄囚在禁而死政和中以最多最少立為賞罰囚不桀濫合復囚禁歲終保明法從之高宗建炎三年四月八日赦文應諸路見禁公事除該今來赦合原放外內有未結正者限十日結絕了當或有合申奏斷遣之人亦仰疾速依條結案申奏不得淹延刑禁四年二月二十三日德音紹興元年正月一日改元赦九月十八日明堂赦四年九月十五日明堂七年九月二十二日明堂赦九年正月五日新復河南州軍赦十年九月十日明堂赦十二年九月十三日徽

宗梓宮還赦內申奏下不得留滯其經一年以上未結
絕者令提刑司限十日根究見住滯去處申尚書省取
旨施行十三年十二月八日南郊赦十六年十一月十
日南郊赦十九年十一月十四日南郊赦二十二年十
一月十八日南郊赦二十五年十一月十九日南郊赦
二十八年十一月十三日南郊赦三十一年九月二日
明堂赦並同上制四年二月二十三日德音三省樞密
院淹延刑禁可限德音到日令提刑司關牒所部州軍
照會今後奏案並發往行在同日德音鞠獄干證人無
罪依條限當日責狀先放訪聞州縣多將干證無罪人
與正犯人一例禁繫動經旬月公然乞取蓋緣當職官

漫不覺察致平民受弊自今監司常切覺察按劾無令
蹈習前弊違例條法十二月二十九日江南西路轉運
判官張匯言之將應係昨因蕃寇潰兵作過之時若有
乘時殺人放火虜奪財物者如首領人已經捉獲依法
斷罪外其餘徒黨元係脅從本無他意者委州縣詳度
虛實方許受理所有緣此見禁勘公事既大情已正小
節未完並許結斷詔仍委提刑司專切點檢覺察即不
得將作過正賊妄作脅從之人一例不行受理其見禁
公事限半月結絕 紹興二年七月十五日刑部言據
臣僚奏請縣囚在禁病者流罪以下情款已定皆許如
在京一司法責保知在緣依條犯罪徒以上送州情款

方定即是在縣別無流徒罪情款已定禁囚外看詳在京法條謂病囚因重非充惡者許責保在外損日追斷紹興法杖以下囚在禁病者止係量病勢聽家人入侍即無該載因重者許責保在外之文今若依臣僚所乞諸州病囚因重者不問徒流並依在京法緣在京病囚依法即時申所屬并刑部御史臺日具醫治加減文狀因重者申所屬差不干礙官押醫看驗有無他故及責囚得病所由連報雖犯徒流罪而情款已定非充惡者方許責保在外損日追斷其在外州軍即別無關申所屬檢察去處若不委官看驗又慮別生姦弊今欲乞諸州病囚比附在京法即時申知通有監司處申監司各

常行檢察日具醫治加減文狀困重者仍即時申州差不干礙官押醫驗有無他故及責困得病所由連報雖犯徒流罪而情款已定非克惡者即行責保知在州委元差押醫每三日一次看驗如委實病損即時申所屬却行勾追赴獄聽候斷遣從之 十二月二十六日臣

僚言乞自今已後令州縣月具繫囚存亡之數長吏結罪保明申提刑司歲終舉行斷罪之法仍每路比較一州一縣死囚最多之數具當職官吏姓名取旨黜責其最少處亦乞量行褒賞詔令敕令所重別刑修增立刑名申尚書省三年三月五日敕令所增修到條法已入紹興重修敕令及重修斷獄令四年三月六日御史臺

言訪聞臨安府捉事使臣等多私置禁房收繫罪人一
面追呼搔擾非理鍛鍊動經旬日解所屬推治又與當
勘推獄等往還行賄要從元初鍛鍊規圖厚賞致無辜
之人枉被刑禁深可矜恤乞詔有司嚴立法禁許人陳
告仍下臨安府檢察如有私置禁房去處責令日下去
拆其捉事人并推獄情弊常切覺察重作施行從之五
年閏二月十二日尚書省言州縣之吏專事慘酷待其
垂死皆託以疾患殺之亦未嘗依條視驗醫治庶有歲
終計分斷罪條法並不奉行理合申嚴詔諸路去年分
合依條計數至見未見具奏除已行約束外令諸路提
刑司將管下諸州禁囚病死人數遵依條救計分斷罪

仍疾速比較聞奏不得容庇違滯仍候指揮到限十日
專差人賁赴行在於是五年宣州上收禁三百五十五
人即無病死人數以最少去處當職官各轉一官婺州
武義縣七十二人雖死過四人即不及六釐最少處衢
州六百一十八人不曾死過人數內衢州當職官各轉
一官福州即無死損人數當職官與轉一官六年江陰
軍七十四人病死過四人最少臨安府一千六百三十
四人病死無臨安府當職官與轉一官七年福州六百
八十二人病死無福州當職官與轉一官五年舒州宿
松縣七人內一名病死計死一分當職官特降一官惠
州病死二分六釐以上當職官特降一官六年洋州一

百二十二人病死一十二人當職官特降一官七年汀
州武平縣四十人死損二人紐及五釐汀州武平縣當
職官展一年磨勘十二年九月十三日赦文勘會禁囚
貧乏無家供送飲食依法每名官給鹽菜錢五文即今
物貴行在可增作二十文外路增作一十五文仍令當
職官常切檢察毋令減剋作弊十三年十一月八日南
郊赦勘會禁囚無家依法官給飲食訪聞近來州縣多
不預行橋備取給公吏因而格剋致多瘦損仰逐州守
臣斟量每月預行橋備應副毋得減剋作弊十三年六
月四日詔今後應諸官司送下見禁取會未完并患病
罪人赴在城巡撫司知管責保人並與依臨安府見禁

藥罪囚例支破飲食內病患者差醫人醫治尋詔諸路
州軍依此十四年五月二十九日臣僚言刑辟之間禁
繫爲重其罪當禁者有歷以書之應書不書具有成法
比來州縣或避滯留之責更不附正歷輒置單子以爲
私記使案察者無以稽察淹抑者無所訴告欲望申飭
有司檢坐前後條令嚴行禁止從之 二十一年三月
二日詔今後命官犯罪逃亡如勘得干繫人已供情犯
分明即據招先次結斷案後根提候獲日依已斷干繫
人數供具案申奏以成都府路提點刑獄司有請從刑
部看詳閏四月二十六日臣僚言紹興令諸囚在禁病
者給官藥物醫治大理寺醫官二員輪日宿獄緣官中

不曾支給藥物又無合破官錢或遇疾疫名有醫而實
無藥法意幾為虛設望明詔有司行下內外之獄量支
官錢修合湯藥所費甚微而所利甚大上曰可令戶部
依紹興令措置官給藥物酌度合支錢數申尚書省尋
詔戶部措置到每歲殿前馬步軍司各支錢五十貫文
大理寺一百貫文京府節鎮一百貫文餘州六十貫文
大縣三十貫文小縣二十貫文置歷收支若歲終餘剩
錢數即充次年支用二十七年十一月二十七日詔諸
路見禁公事所犯人約係死罪即仰州軍具單狀二本
申提刑司檢察本司繳連一本申刑部點檢勾銷如後
來勘得却是大辟公事亦具情節供申其單狀並依旬

瘦

具禁狀條式施行 熙寧四年七月御史陳乞如上件
至是臣僚乞檢行故事從之二十八年十月二十三日
南郊赦文勘會在獄病囚官給藥物醫治病重責由自
有成憲竊恐州縣循習苟簡致有瘦死誠可憐憫仰諸
路監司守倅檢察毋致違戾即不得在職醫官糾差醫
僧及貨賣藥人直獄恣行追擾啟倖生事以致淹延三
十一年九月二日明堂赦同此制以上中興會要孝宗隆興元
年十一月二十六日中書門下省言勘會大理寺臨安
府獄囚近緣雪寒已降指揮除破糧食外更給柴炭貧
者假以襖袴手衣之類其外州軍亦合一體施行二年
正月二十七日尚書省言福建諸州軍間有地震之處

已令本路帥臣監司條具民間利病措置賑恤竊慮刑
獄冤濫禁繫淹延理合催促詔本路監司取索所部州
縣見禁罪囚一一推究所犯以時結絕如故作淹延具
守令姓名申尚書省六月八日臣僚言比來州縣獄囚
率多死亡蓋由禁繫猥衆牢戶不清當此蒸溽易成疾
疫欲望嚴申教守令將見禁罪囚除有罪犯深重速行
勘結外其餘所犯稍輕并枝蔓干證人並日下決遣疎
放從之同日臣僚言訪聞州縣之獄率多滯留不決致
前後死亡不一伏望申教諸路監司察所部守令如有
貪虐昏謬尚敢故作淹延以致在獄多死之人即具姓
名按劾重寘典憲從之

乾道元年正月一日大禮殿

殺勘會在獄病囚官給藥物醫治病重責出自有成憲
竊恐州縣循習苟簡致有瘦死誠可憐憫仰諸監司守
俸常切檢察毋致違戾三年十一月二日六年十一月
六日九年十一月九日大禮赦並同此制同日赦訪聞
州縣多以私意將不應禁人寄獄皆不書禁厯或遇按
察官到盡責付公入在外看守候按察官過却行收禁
動經歲月雖有約束竊慮尚循舊弊仰監司覺察按勘
以聞當議重寘典憲十二月二十^十九日新知潮州黃昭
祖言竊見潮州近奏海陽縣見禁獄囚盜取獄內器仗
奔逸契勘州縣每獲盜賊其贓仗並寘獄內以備估値
定罪歲月淹延不復防閑故時有投隙破械直取器仗

而出者歟。乞明敕州縣自今遇獲兇盜祇留贓物在獄
照看其器仗並寄收甲仗庫從之。六年二月二十二日
左諫議大夫陳良翰言竊見州縣囚禁往往不即與決
非特有正禁之繁又且有寄禁之濫疫癘一作多殞非
命契勘禁囚自有日限其載甲令不許淹延。乞特降
指揮應州縣之獄仰守令依限決遣從之。十一月十六
日大理少卿周自強言乞自今監司郡守按察官吏如
遇差官勘鞫內合有干證止許追繫切人或有泛濫追
逮淹延囚禁致多瘦死者並令提刑司按奏從之。七年
六月十日刑部準批下臣僚劄子乞令諸州長吏每旬
同當職官慮問州院司理院禁囚諸路監司每季親詣

所部州縣將見禁囚徒逐一應問照對上項申請乾道
重修令該載甚備今乞申嚴行下從之八年五月一日
刑部侍郎鄭聞言竊見州郡獄囚方當盛夏漸染時氣
或致疾病雖有醫者療治多不留意遂致死亡相繼乞
下諸路提刑司將州縣醫人姓名籍定務在加意診視
不得減^製從之十月九日工部侍郎兼臨安府尹莫
濛言乞自今將州郡徒以上囚人禁及三月者今提刑
司類申刑部置籍立限催促如或稽程繩治如律庶幾
獄囚不致久繫從之九年三月二十二日詔刑部長貳郎
官并監察御史每月通輪一員分作兩日往大理寺臨
安府親錄囚徒仍具名件聞奏

以上乾道會要
淳熙元年正月

八日詔諸路禁囚有不得其死或人數稍多獄官令佐
守倅悉坐其罪不以去官赦原以大理卿周自強言廣
西獄囚死於凍餒笞掠者甚衆故有是命三年四月二
十七日知潭州李椿言乾道新書諸強盜囚在禁每火
死及五分以上依囚在禁病死歲終通計及一分法蓋
防獲盜之人徼求功賞誣執平人計數坐獄身死之弊
然假如強盜二人一名偶死便成五分坐一歲通比及
分之罪可謂不幸敕令所看詳欲於上條每火字下添
入謂三人以上五字為注文如死及五分以上合依強
盜五分法科罪外若強盜二人以下在禁病死止用諸
囚在禁病死法歲終通計分數科罪施行從之十一月

十二日南郊赦應諸色人犯罪在禁雖已未結正見得
合該赦原止因元係指揮准勘合具情犯申省有司
不敢一面原放申會待報可並直依今赦施行六年九
年十二年十五年赦同同日赦見禁公事有合結正者
限十日結絕有合申奏者亦疾速申奏不得淹延刑禁
在外委提刑司在內委御史臺常切覺察六年九年十
二年十五年赦同八年五月二十三日詔縣獄如州兩
獄例以常平或義倉米支破糧食歲上繫囚饑寒瘦死
於獄者為吏殿最臣僚言縣獄不支糧多有飢死故是
有命十二年十一月二十二日南郊赦州縣囚糧合以
係省米充訪問諸縣不即依時支撥止取給於吏卒可

令監司常切覺察毋致遲戾十五年明堂赦同十三年
十月八日前權知德慶府趙伯邊言每遇盛暑之月其
守倅等點檢催促結絕刑禁仍仰本路監司復行檢察
如減製^製違戾按劾聞奏而遠方州縣所謂慮囚者實為
文具守臣去郡獄不遠尚有親臨決遣者至於通判職
官或畏^畏暑或憚遠涉往往祇令人下縣取索而供報
上司却云某日某時躬親起離諸路州縣如慮囚敢不
親行許令監司守臣覺察奏劾施行從之^{以上孝紹熙}
元年七月十二日臣僚言州縣獄必有歷凡有罪而入
禁者必書其月日以時檢舉結絕無致淹延此法意也
往往不能仰體朝廷欽恤之意疚心獄事公事到官付

之吏手不問曲直將干連無辜之人一例收禁獄行常
滿不上禁歷號為寄收乞取厭足旋行踈放乞申飭諸
路提點刑獄常切覺察自今後分上下半年從本司印
給赤歷下州縣獄官以時抄轉所禁罪人不得別置寄
收私歷州委司法縣委佐官五日一申隨即檢舉催促
結絕巡歷所至索歷稽考如轉將干證無罪之人淹延
收繫及隱落禁歷不行抄上而別置歷者按劾聞奏官
吏重寘典憲從之十月二十五日臨安府言已降指揮
依倣開封府其三獄直司并錢塘仁和兩縣公事所隸
臺察罪囚禁歷日申臺部即無漏落比之外郡隸提刑
司事體不同若一槩從提刑司出給禁歷委官檢舉催

促結絕不唯禁歷在路恐有泄漏慮委官一節於臺部實有相妨乞遵從御史臺已降指揮施行從之二年三月二十四日刑部言大理寺叅詳臣僚奏請州縣之間諸案知在人數多少歲月久近莫得而知乞委提刑分上下半年從本司印給赤歷下州縣凡逐時諸案知罪之人並令抄轉在歷催促結絕臨安府申本府三獄直司及錢塘仁和縣公事所隸臺察令來令置知在人歷其臨安府并錢塘仁和兩縣難以從提刑司一槩同外郡給歷今看詳欲委自本府詳照臣僚所奏別給知在人歷分上下半年印訖發下三獄直司并錢塘仁和兩縣遵依已降指揮將諸案應知在人抄轉施行若臺

部官每遇點檢刑獄許從一就取索按驗從之十一月
二十七日南郊赦在獄病囚官給藥物醫治病重責出
自有成憲深慮州縣循習苟簡不與救療及不照條責
出因致死亡仰監司知通常切覺察四年七月二十五
日知臨安府袁說友言傳承舊制凡盜賊累犯其人桀
黠難制與已斷逐而復回者項筒永遠拘鎖外縣寨日
給糧食惟是積日既久拘囚數多罪固可嫉情亦可憫
在發羈管編管各有年限蓋未嘗終其身而拘囚也乞
將本府見行項筒拘鎖之人如元係配隸者即押回元
配所如有疆壯者即照已承指揮與分刺屯駐軍其餘
分押出本府鄰州界詔令臨安府將見管賊人各差人

管押分送外州軍牢固拘管日具存亡中樞密院

以上光宗

會紹興五年九月十四日明堂赦勘會在獄病因官

給藥物醫治病重責出自有威憲深慮州縣循習苟簡

不與救療及不照條責出因致死亡仰監司知通常切

覺察

自後郊
秋並同

慶元六年五月六日詔令大理寺臨安

府并屬縣及三街諸路闕雨去處見禁囚徒並仰即時

點檢看視其間稍有病患即遵守見行條法施行毋為

文具嘉泰元年正月七日臣僚言乞令諸路提刑司

檢坐應禁不應禁條法出給榜版附大字書寫行下逐州

縣委自通判縣丞各於獄門釘掛曉示被禁之人如因

罪入獄仰就取禁曆書寫所犯年月日姓名著押歷上

以並新收出獄日亦如之以便銷落其有不能書寫者
令同禁人或當日書鋪代書親自押字仰通判縣丞逐
時點檢如遇月終申發禁歷赴提刑司從提刑躬親檢
察行下內有不應禁而收禁者提刑按劾守令以聞仍
許不應禁人或家屬經提刑司越訴如提刑不為受理
仰經刑部御史臺越訴乞從本臺覺察彈奏仍乞更令
提刑司每歲終檢察管下州縣獄空最多并禁人最少
者一兩處具申尚書省取旨激勸如因民訟見得不實
坐以妄申之罪從之三年十一月十一日南郊赦文在
法禁囚應給飲食合於轉運司錢內支其病囚藥物合
於贓罰錢內支訪聞州縣違戾却將合給禁囚飲食止

令獄子就街市打掠或取給於吏卒病囚藥物抑勒醫
人陪備是致禁囚飲食不充飢餓致病醫人無錢合藥
病囚無藥可服多致死亡誠可憐憫可自今赦到日應
合給囚糧並仰守令於轉運司錢內分明取撥置造飲
食病囚藥物並於賊罰錢內支破修合各具赤歷收支
不得仍前再令獄子輒於街市打掠及勒醫人陪備藥
物如違仰監司按勘以聞重寘典憲自後郊祀明四年
堂赦大至同
正月初六日臣僚言乞內委刑部外委提刑戒察獄司應
非事干人命及重害公事勿許妄禁從之十八日臣僚
言竊見縣獄苦無囚糧而城下之邑九甚法許於運司
錢內支往往縣道不敢支破例多倚辦於推獄私取於

役戶分甘於同禁之人，軍食入獄，獲欸紛然，極可憐憫。乞從諸縣申州，就於常平米支撥。歲終州具實支數申提舉司出豁從之。開禧三年三月二十九日詔：應州縣輒將病囚押下巡尉司，以致死亡者，許被死之家直經刑部陳訴，仍令提刑司於歲終別項檢察，併行具申。將州縣官重作施行，以臣僚言州縣之獄遇有病囚，多是不切醫治，聽其自愈，至疾勢稍篤，欲避免在禁死亡之數，則一切付巡尉司交管。彼巡尉司既無醫藥可療，又無飲食可給，拘繫空屋，困頓飢餓，往往至於死亡。故是有命。嘉定三年四月二十六日詔：諸路提刑司歲終擇一路獄囚瘦死最多者，必按劾以懲不職，擇一路

醫療全活最多者必薦舉以勸其勤刑部則總覈之從
臣僚請也七年正月七日詔應州縣除事干人命及重
害公著事許照條收禁提刑司以州縣申到禁歷須管躬
親檢察將不應禁及久囚去處嚴行責罰毋為文具從
臣僚請也八年六月十三日臣僚言夫州縣之獄凡為
民害者朝廷因臣僚奏請屢嘗戒飭獨囚糧一事未見
施行獄戶沈鬱易於生疾一有乏食病輒隨之州縣但
謂之獄瘟發動而不知其端蓋在於此江浙州郡皆有
囚糧遠州僻郡大率踈畧乞令僻遠之州皆視內郡以
見管食未正行支破縣則以贓罰錢物收糴充數仍令
提刑司免其解發別置循環曆二本名曰囚糧歷日具

支破姓名取其著押不願支者亦明書何人饋餉俾隨
禁歷月申提刑司以備參考仍乞行下提刑司中嚴見
行條法歲終類申刑部閱瘦死人數多者將守令量行
責罰從之十六年八月八日大理司直朱藻言乞行下
諸路提刑司嚴戢諸縣除附郭縣獄許通判寄收罪囚
外凡佐官遇有合收禁人須具事因申解本縣遵照條
令書上禁歷如擅自送獄不許接受詔送刑部看詳申
尚書省已而刑部言準都省批下朱藻奏尋下刑寺看
詳今據本寺申劾諸囚不應禁而禁者徒二年當職官
知情與同罪失覺察者減二等許被關留人越訴看詳
得州縣將不應禁人輒行收禁自有見行條法指揮其

聞縣佐寄收人多是不曾書上禁歷非理因禁今本官
奏請誠為允當本部欲從刑寺看詳到事理施行從之
十一月六日臣僚言訪聞安邊所屬官多不稟命使長
輒將每日送下公事不問輕重遇夜寄錢塘仁和兩縣
并諸廂尉司等處淹繫日久不即予決拘囚囹圄病痛
相纏前後死者不知其幾乞行下兩縣等處每日仰官
吏具本所有無送下寄收公事申御史臺以便稽考如
或仍前違戾許被寄禁人家屬直經本臺陳訴訪聞得
實將當職官具申朝廷重賜錫責公吏決配從之

以上
寧宗

會
要